

## سرى للغاية

محضر اجتماع مجلس الوزراء برئاسة الرئيس جمال عبد الناصر

القاهرة - قصر القبة فى ٢٩ ديسمبر ١٩٦٨

### الحاضرون

الرئيس جمال عبد الناصر، صدقى سليمان.. نائب  
الرئيس ووزير الكهرباء والسد العالى، كمال رفعت..  
للعمل، عزيز صدقى.. للصناعة والبتترول والثروة  
المعدنية، ثروت عكاشة.. للثقافة، محمد أبو نصير..  
للعدل، سيد مرعى.. للزراعة والإصلاح الزراعى،  
حسن عباس زكى.. للاقتصاد والتجارة الخارجية، عبد  
الوهاب البشرى.. للانتاج الحرى، محمود رياض..  
للخارجية، شعراوى جمعة.. للداخلية، أمين هويدى..  
للدولة، محمد فائق.. للإرشاد القومى، كمال هنرى  
أبادير.. للمواصلات، فريق أول محمد فوزى..  
للحربية، محمد حلمى مراد.. للتربية والتعليم، محمد  
عبد الله مرزبان.. للتموين والتجارة الداخلية، إبراهيم  
زكى قناوى.. للرى، على زين العابدين صالح.. للنقل،  
أحمد مصطفى أحمد.. للبحث العلمى، السيد جاب الله  
السيد.. للتخطيط، حسن حسن مصطفى.. للإسكان  
والمرافق، محمد بكر أحمد.. لاستصلاح الأراضى،  
عبد العزيز محمد حجازى.. للخزانة، محمد حافظ  
غانم.. للسياحة، محمد صفى الدين أبو العز.. للشباب،  
عبد العزيز كامل.. وزير الأوقاف وشئون الأزهر،  
محمد حمدى عاشور.. للإدارة المحلية، عبد الوهاب  
البرلسى.. للتعليم العالى، حافظ بدوى.. للشئون  
الاجتماعية، محمد عبد الوهاب شكرى.. للصحة.

### المحتويات

#### الصفحة

#### الموضوع

- ١ - تعثر الجيش الشعبى، وسد نقص الدفاع عن الأهداف المدنية المهددة من اسرائيل
- ٥٢ - إجراءات الدفاع عن مطار القاهرة
- ٥٤ - حجم القوات المصرية مقارنة باسرائيل
- ٥٤ - محمود رياض يتحدث عن الحل السلمى
- ٥٦ - أسباب الهجوم على مطار بيروت فى اليوم السابق
- ٥٧ - أسباب زيارة جروميكو وسفير الهند فى واشنطن الى القاهرة
- ٥٩ - رفض وساطة نائب وزير الخارجية الرومانية غير المباشرة بين مصر واسرائيل
- ٦٠ - عبد الناصر غير متفائل بالحل السلمى، لماذا؟
- ٦٤ - موضوع التعليم والشدة مع الطلبة
- ٧٠-٦٦ - طلبات اعتمادات الطرق والزراعة وإصلاح الأراضى والإسكان والرى

## سرى للغاية

### قرارات مجلس الوزراء

فى ١٩٦٨/١٢/٢٩

بحث الموقف العسكرى والاستماع الى تقرير من الفريق أول محمد فوزى وزير الحربية.  
بحث الموقف الدولى بما فى ذلك نتائج زيارة أندريه جروميكو وزير خارجية الاتحاد السوفيتى  
الى القاهرة.

موافقة المجلس على المذكرة التى قدمها وزير استصلاح الأراضى بشأن اعتماد إضافى بمبلغ  
٢ مليون جنيه بالميزانية الحالية لاستكمال الأعمال العاجلة لمناطق الاستصلاح الجديدة، والتى  
سبق أن ناقشها المجلس فى جلسة سابقة؛ وهى تشمل عددا من مشروعات الرى والصرف والإسكان  
والمرافق ورصف الطرق وتشغيل وصيانة الشبكات الكهربائية واستكمال عمليات استصلاح  
واستزراع منطقة إمتداد مريوط.

وقد قرر المجلس عقد اجتماع آخر مساء غد.

## سرى للغاية

محضر اجتماع مجلس الوزراء برئاسة الرئيس جمال عبد الناصر

القاهرة - قصر القبة فى ٢٩ ديسمبر ١٩٦٨

عبد الناصر: بالنسبة الحقيقة لموضوع الدفاع الشعبى، أنا كنت ناوى أتكلم فيه الدور اللى فات وكنت كلفت حمدى إنه يجهز مذكرة وكان جهز لى مذكرة الجلسة اللى فاتت، اللى أنا فاهمه إن موضوع الجيش الشعبى مش ماشى خالص! أيوه يا حمدى.

عاشور: إذا حبيت سيادتك أدى صورة واضحة عن الإجراءات اللى تمت فى الجيش الشعبى منذ أن أعلن عن تشكيله.

فى المحافظات: كل محافظ دلوقتى بيجتمع أسبوعيا مع المجالس الخاصة به لدراسة الموقف بصفة دورية فعلا. الأهداف بتاعتنا السيد وزير الحربية حدد ٢٤٢ هدف فقط، وإداله أسبقية أولى. إحنا كمحافظين حاصرين الأهداف كلها ١٢٤٦ هدف، ال ٢٤٢ بتوع الجيش خد منهم ١٤٢ وإدى للمنظمات ١٠٠. لغاية دلوقتى طبعا إحنا كنا عارفين المقاومة الشعبية الجيش المنظمات لم يحتل المواقع بتاعته، فيه أماكن بتحتلها الشرطة وفيه فرق كبير بين الحراسة وبين الدفاع عن الموقع نفسه بالذات.

الأهداف اللى بتلى الأسبقية الأولى حضرناها كمحافظين فقط عن أسبقية تانية وعن أسبقية تالثة. لو أدى صورة واضحة عن اجتماعى مع السادة الوكلا فى الوزارات اللى كانوا مختصين بالأمن، الفكرة إن بعد هذا الاجتماع ومر يمكن حوالى ٣ أسابيع أو أكثر محسوش بمسئوليتهم الكاملة عن الدور اللى متعينين فيه؛ بمعنى إن أنا مثلا طلب منى إمبارح بالليل بيان عن الكبارى الخاصة بالعبور الكبارى الخاصة بالسكة الحديد فعلا وبعدين القناطر؛ فكان المفروض إنى آخذ ده من الوكيل المختص اللى يقدر يوافقنى بكل كوبرى عنده وله أهمية خاصة. قعدت أتصل بالسادة المحافظين، وبالصدفة أنا مجمع فى دوسيه ال ١٢٤٦ هدف فعلا، لكن جزء بيحرسه الجيش طبعا داخل فى ال ١٤٢، وجزء الشرطة قائمة بحراسته فقط داخل ال ١٠٠ بتوع المنظمة، وجزء تانى متروك خالص دون حراسة.

لو آجى أتابع البيان كله، فأجد إنى أنا عندى مجموع الكبارى فى المحافظات كلها ١١٢ كوبرى عبور، عندى ٣٨ كوبرى سكة حديد، قناطر وأنفاق ٥٢. الحقيقة الواحد بيندهش لما آجى أراجع وألقى إن مسؤوليات الدفاع واخدة ٢٩ كوبرى فقط كقوات مسلحة، والمفروض إن منظمات الدفاع الشعبى فى الأسبوع الأول من يناير تاخذ ١٩؛ يبقى فيه عندى ١٥٤ كوبرى سواء كان عبور أو سكة حديد أو قناطر متروكة دون حراسة

## سرى للغاية

لغاية الآن! فيه بعض المحافظات تعاني صعوبة ضخمة فى المتطوعين زى محافظة كفر الشيخ؛ محافظة كفر الشيخ بالذات مناطق نائية فى الشمال الأراضى بعيدة جدا، طبيعة الأهالى اللى عايشة هناك المحافظ نفسه تعب على إنه ياخذ المتطوعين منها يعنى! بعض المحافظات بتطالب بالتغذية والاعتمادات للبس فى الشتا.. الى آخره، وإحنا طبعاً حاطين فى الهدف بتاعنا إن مفيش اعتمادات إضافية تفتح لهذا الكلام.

التدريب مشى عندنا باستقبال المتطوعين، وصل عندنا من المتطوعين حوالى ٢٢,٦٩٤ فى ٢١ محافظة، والـ ٣ محافظات بتوع القنال فيهم مقاومة شعبية، أتم الكشف الطبى خلال شهر ديسمبر ٨,١٨٠ ونجح منهم ٤,٠٠٠، الاتحاد الاشتراكى طبعاً بنبعت ناخذ موافقة وأجهزة الأمن وافقوا على ٥,٠٠٠. جارى تدريب فعلا الدفعة الأولى مجموعها ٢,٣٩٥، فى زيارتنا للمحافظات المختلفة فى وجه قبلى مثلا فى أسبوط فعلا التدريب ماشى، فى طنطا فى كثير من المحافظات؛ بحيث إن عندى ١٢ محافظة أتمت تدريب الدفعة الأولى. الحكمة مش إن أنا أتم تدريب الدفعة الأولى، لازم يسبقها الثانية والثالثة عشان الغيارات فى المستقبل. فعندى ١٢ محافظة أتمت تدريب الدفعة الأولى، فيه أربع محافظات تنتهى من التدريب بتاعها فى نهاية هذا الشهر، وفيه محافظات تعبانة زى مطروح والشرقية والمنيا والمنوفية لبعض مصاعب، وكفر الشيخ واقفة خالص لم يتم التدريب. المعسكرات بتاعتنا اللى احنا خدناها بمساعدة طبعاً القوات المسلحة ٤٣ معسكر.

خطة التدريب موضوعة فى كل محافظة، على اعتبار فيه عشر ساعات تدريب و ١٥ ساعة لأعمال الدفاع المدنى و ١٥ ساعة للتوعية السياسية. كل هذه الموضوعات بتيجى توقفنا فى الآخر لأن عهدتنا فى المحافظات ٧٠٠٠ بندقية فقط؛ فلنفرض إن الدفعة الأولى انتهى التدريب بتاعها، لو دخلنا فى الدفعة الثانية مش هنلقى سلاح ولا ذخيرة للدفعات اللى هتدرب فعلاً! الجيش برضه وضع أساس لعدد الأسلحة أو الذخيرة اللى تتوزع على كل هدف، وأعطى للمحافظة ١٠٠ بندقية للتدريب فقط؛ دول اللى جاريين بيهم الشغل، وعلى اعتبار إننا فى المستقبل هنعمل قعدة ونشوف زيادة السلاح لزيادة المتطوعين المستقبليين.

اللائحة سيادتكم تكرمتم ووافقت عليها ووصلتتى من حوالى ٣ أيام، وفيها برضه بعض النقاط الأساسية علشان نقدر نستكمل فيها. إتفقت مع السيد وزير الحربية والسيد وزير الداخلية على اعتبار إن هيلزمنا قعدة قبل نهاية هذا الأسبوع، على اعتبار إن المحافظين موجودين يوم الإثنين وياخدوا التعليمات النهائية.

## سرى للغاية

لكن اللى أنا أحب إننا نحسمه النهارده، متى يوزع السلاح فعلا؟ ومتى تحتل منظمات الدفاع أماكنها فعلا؟ أنا كنت مقدر الأسبوع الأول من يناير، ولكن لظروف التدريب وعدم وصول بعض الضباط أو صف ضباط أو المتطوعين فعلا، بأرجو إن الميعاد يكون لغاية ١٥ يناير؛ بحيث نقول إننا غطينا كل النقاط، وإن احنا عرفنا الخطة اللى هنمشى عليها فعلا فى الاحتلال ده بتاع المنظمات الشعبية.

الحراسة اللى هى بتاعة رجال الشرطة، مش مغطية كل الكبارى المتعددة أو الأنفاق فعلا؛ فبرضه عايزين نراجع معاهم باعتبار إن وزارة الداخلية تحسم الموقف إن المقاومة الشعبية أو منظمات الدفاع هى اللى هتقوم بهذه الحراسات أم الشرطة، الى أن يتسلمها الجيش فى الأسبوعية الأولى.

فيه بعض المحافظات عندى هنا من الـ ١,٢٤٦ مغالين طبعا باعتبار إن المنشآت بيشرح بإن مسؤوليته كبرى عليهم، لكن فى اللائحة نص على أن تشكل لجنة اشتراك من الحربية والداخلية والإدارة المحلية تمر وتراجع الخطة فعلا، وتخلى كل محافظ يلتزم بالأهداف اللى محطوة ليه فعلا. برضه بأرجو قبل اجتماع المحافظين إننا نكون خلصنا الجمعة دى الأهداف النهائية اللى هنلزم بيها كل محافظ فى العمل بتاعه.

السادة الوكلاء بتوع الوزارات وأنا بعتبرهم مسؤولين كمسؤولية المحافظ، وسيادتك كنت أشرت إنه يبقى مستشار فنى للمحافظ المستشار العسكرى، بطلب من الإخوة الوزراء إننا نحكم الرقابة على الوكلاء الفنيين دول اللى هم بتوع الأمن فى مراجعة الأهداف والمنشآت الحيوية مع المحافظين؛ لأن فيه بعض الوكلاء مقابلوش المحافظين لغاية النهارده فعلا، إن كان هناك ثمة إضافات أو تعديلات للأسبوعية اللى المحافظ حطها ممكن برضه إضافتها. وبعدين يجب على كل وكيل وزارة فنى مختص يصدر التعليمات اللازمة اللى هياخذها من المحافظ؛ لأن المحافظ بيشتكى إنه مش قادر يصل الى كل الجهات اللى موجودة عنده فيها مرافق، وبعدين له دور برضه أساسى وهو التفتيش.

النهارده بالصدفة أنا جيت السيد وكيل الوزارة بتاع وزارة النقل، على اعتبار إن يساعد المحافظ ويقوم بالتفتيش فعلا على الأماكن بتاعة محطات السكة الحديد وكبارى السكة الحديد، وراجعت وجه قبلى عشان نشوف عدد الأنفاق والكبارى. فيه بعض المحافظين اللى موجودين فى وجه قبلى مدنيين فعلا وكانوا بيشتكوا من بعض المستشاريين العسكريين؛ فأحنا اتكلمنا مع السيد وزير الحربية وغير ليهم بعض المستشاريين العسكريين. لكن حراسة بعض الكبارى والأنفاق خصوصا بتاعة السكة الحديد، أنا بقول إنها يجب أن تأتى فى الأسبوعية الأولى باعتبار إن الأحداث الجارية اللى بنشوفها يمكن تعرضنا لمحاولة أخرى من جانب إسرائيل.

## سرى للغاية

فمجموع الكبارى دى بالذات لا يتعدى ٥، اللى هى على طول وجه قبلى سواء كان فى بنى سويف أو أسيوط ومعها قناطر أسيوط، وأنا شفت قناطر أسيوط بالذات والمحطة بتاعتها. فإذا رجعنا على وجه قبلى بالذات.. نجد إنه من أول بنى سويف فيه كوبرى واحد عبور وكوبرى سكة حديد وعنده قناطر ٢، المنيا فيها كوبرى واحد، أسيوط فيها برضه كوبرى و ٢ قناطر، سوهاج فيها ١ كوبرى عبور وكوبرى سكة حديد، قنا فيه ٢ كوبرى سكة حديد و ٢ قناطر، وأسوان فيها قناطر ١.

باعتبار إن الجيش برضه يقدر يعاوننا فى الأهداف دى بالذات، باعتبار إنها أساسية وحيوية، منقدرش نستنى لغاية لما التدريب يخلص ونقدر نوزع منه لمنظمات الدفاع. سيادة الفريق فوزى له وجهة نظر، باعتبار إنه هياخد من الشرطة عدد أكثر ويقدر يدى للمنظمة ناس من الشرطة على لما إحنا ناخذ المتدربين بتوعنا.

موقف القاهرة مختلف، لم تعلن القاهرة عن متطوعين، واكتفت إنها بتاخذ من الناس بتوع المقاومة الشعبية اللى كانوا موجودين، والعدد بتاعهم هنا وافى وجارى التدريب فى المعسكرات حاليا؛ باعتبار إنه هيقدر يسد عندما يأخذ التعليمات الخاصة بتوزيع السلاح وبالاحتلال فعلا.

فأنا اتصلت بالسيد محافظ القاهرة على اعتبار إنه عنده النهارده ما أتم من المقاومة الشعبية كتدريب وكأسلحة. عنده التدريب الابتدائى ناس أتموا التدريب الابتدائى فى القاهرة فعلا ٧٦,٧٠٠، وعنده ناس أتموا التدريب الراقى ١٤,٣٥١، وعنده ناس أعادوا التدريب الراقى ٦,٦٠٩ وبعض الأعداد الثانية اللى هى تدريب خاص زى بتوع الطلبة، ولكن عدا الطلبة فيه ٤,٠٠٠ واحد كل دول من المقاومة الشعبية. فاتناقشنا مع السيد المحافظ على اعتبار متى نحتل الكبارى فعلا؟ متى نوزع السلاح؟ كل ده مرهون باللجنة اللى هتجتمع مع السيد وزير الحربية ووزير الداخلية.

ده ملخص يافندم سريع مما بيدو عليه بعض المحافظات، ولاسيما المحافظات النائبة اللى بتقول: إننا يلزمنى بعض مبالغ خاصة عشان وجبات غذائية أو بعض المساعدات. طبعا الموقف يختلف عن المصانع، كل محافظ حاصر بمصانع هياخد من العمال ومن الورديات. فى تقديرى إن الأسبوع الأول من يناير إننا نأخره يومين أو لغاية يوم عشرة؛ باعتبار إن الفوج الأول من الدفعة اللى اتدربت يستطيع أن يحتل أماكنه بعد مراجعة من القوات المسلحة.

## سرى للغاية

عبد الناصر: هو إحنا كانت جاتلنا معلومات من اسرائيل إنهم معتبرين الأهداف الأولى هي القناطر، والأهداف التالية بعديها هي الكبارى، وبعديها الأهداف الثالثة محطات الكهرباء، والأهداف الرابعة هي المصانع، والأهداف الخامسة هي ضرب المدن.. ده كلام نقلنا عن ديان شخصيا. وبعدين اللي باين إنهم عندهم معلومات عن كل حاجة، وإحنا برضه عندنا معلومات بالنسبة للمخابرات عندنا برضه معلومات عن اسرائيل كاملة. بس الفرق بينا وبينهم إن هم حتتهم كلها ماسكينها؛ يعنى ماسكين اسرائيل وكله يعنى محدش يقدر يعدى إلا لما يعرفوا. وإحنا لغاية دلوقتى يقدرنا يعدوا خصوصا فى المنطقة بين بنى سويف وأسوان؛ يعنى يقدرنا يججوا بين بنى سويف وأسوان ويعملوا اللي عايزين يعملوه!

طبعا لما نيجى بين بنى سويف وأسوان، العملية اللي عندنا هي قناطر إسنا وأسيوط ونجع حمادى، وبعدين عمليات الكبارى والسكة الحديد إذا انضريت بتوقف لنا المواصلات وبتأثر اقتصاديا، وبعدين أيضا كبارى العبور. وبعدين الحقيقة يعنى هو طبيعة اليهود إنهم يجيبوا معلومات عن الهدف اللي هيروحوا له ويتأكدوا منه تماما إنه مفيش مقاومة، ويقوموا بالعملية زى العملية اللي عملوها إمبراح فى بيروت.

والحقيقة المعلومات اللي طالها دي مش نتيجة بيروت، أنا طالب من قبل الجلسة اللي فاتت من حمدى هذا الكلام. لكن الحقيقة نتيجة عملية إمبراح بتدى دلالات أكثر؛ يعنى هي بيروت كانت بتعتبر نفسها إنها حماية أمريكية، وإن لبنان بره الموضوع وملهمش دعوة بحد ولا راضيين يتكلموا فى المواضيع دي كلها.

عملية إن الفلسطينيين طالعين من مطار بيروت، مش حجة كافية لأنهم يعملوا العملية دي اللي بتسبب خسارة حوالى ٤٠ مليون جنيه أو أكثر من ٤٠ مليون جنيه. اللي باين منهم كمان من المعلومات الأخيرة، إنهم متضايقين جدا من عمليات المقاومة وفالقدين أعصابهم خالص.. وده نقلنا عن يارنج لسفيرنا فى موسكو. وبعدين الوضع بينا إحنا الحقيقة مش معقول هفضل ساكتين لازم نبدأ نشغل فى داخل سيناء، وأنا متفق مع وزير الحربية على أساس إننا نشغل فى أقرب وقت ممكن ولو يعنى ننضرب؛ لأن ما هو يإما نبدأ حرب بقى يإما مفيش لأن مش باين إن فيه أى أمل لأى حاجة من العمليات.

الروس فى زيارة جروميكو جابين يتكلموا على الموضوع الأساسى عايزين يتقدموا بمشروع، واتصالاتهم بالأمريكان والكلام بهذا الشكل ببسألونا. والحقيقة كلامهم.. يعنى حتى رياض كان ليه بعض الأفكار عايز يعدل وأنا قلت له: منعدش ولا حاجة. وقلت لهم أنا وافقت على كل هذا الكلام والكلام يمشى، بس أنا متأكد إن اليهود مش هياوافقوا عليه.. لن يوافقوا عليه إطلاقا! ومشى جروميكو على أساس إنهم هيحاولوا حل سلمى.

## سرى للغاية

تانى يوم أنا قعدت مع الجنرالات، قالوا لى: إحنا مالناش دعوة - اللي كانوا حاضرين مع جروميكو - إحنا مالناش دعوة بكلام جروميكو، ده كلام تانى إحنا بنقله: ماينفعش برضه إذا كان الجيش هيفضل قاعد كده وساكت مفيش مرحلة انتقال من الدفاع للهجوم فى يوم وليلة، يعنى لازم يبقى فيه activities. وده حقيقى يعنى حتى الروح المعنوية إحنا النهارده البلد متضايقه كلها؛ معرفش إنتو حاسين بعملية بيروت.. بيقولوا إحنا هنعمل إيه؟ إحنا الحقيقة دلوقتى ماينقدرش نبتدى فى حاجة أبدا إلا إذا غطينا الأهداف الحيوية. وأنا فى رأى إن الجيش الشعبى هياخد وقت، ولكن لازم الجيش الشعبى يمشى بقانون الأحكام العسكرية، واللى أدام تطوع وتغيب عن وريته باحاكمه، وإلا هيبقى جيش زى قلته. ولكن أنا فى رأى بنزود فى قوات البوليس، هو عنده كتائب صاعقة بنزود فى البوليس؛ لأن إفرض حتى أخذنا الجيش كله ودخلنا بيه الى سيناء، طب هنا ممكن اليهود بيعتولنا برضه بالهليكوبتر. عملية نجح حمادى عملوها بالهليكوبتر وإحنا مرضناش نقول فى اللجنة المركزية، حتى يمكن فوزى لما اتكلم هنا برضه عشان محدش يتكلم. يعنى نزلوا بطيارتين هليكوبتر، ونزلوا عشرين واحد وراحوا حطوا المفرعات وعملوا العملية. وإحنا الحقيقة قللنا من قيمتها على أساس إن ممكن بيقالنا الحق إن نعمل رد فعل بالطيارات.

إمبارح هم فى مطار بيروت نزلوا طيارتين بـ ٣٠ واحد، مسكوا ميكرفون مطار بيروت وبقوا يدوا تعليمات للناس.. إمشوا وإطلعوا! وسيطروا على العملية كلها وخلصوا على الـ ٣ شركات اللي هناك والورش اللي هناك.. هم عندهم أحسن ورش.

ممكن العملية دى الحقيقة تتعمل فى حلوان كمان من غير ما نحس. أنا مرة بلغونى إن فيه طيارة هليكوبتر جت ونزلت فى طريق السويس فاكر فيه شك، وبعدين الحقيقة أنا بالنسبة عندى للبيت أنا واحد أمريكانى قال لى: إن اليهود هيجولك هنا فى البيت لأنهم فى حالة.. أنا عامل حراسة وعامل البوابات وأنا متصور إنهم فى حالة الجنان دى يعملوا أى حاجة!

فالحقيقة على هذا الأساس قدامنا.. أولا لازم نشغل الحقيقة فى داخل سيناء، مفيش فائدة فى حل سلمى.. هنجاول، كان لازم نبتدى نشغل وفى نفس الوقت لازم نغطى كل الأهداف المهمة. إن كنا هنقول بقى ١٣٠٠ هدف هو الحقيقة لازم ندى أسبقية للأهداف اللي بين بنى سويف وأسوان، العملية هتطول وهنفضل قاعدين ساكتين كده؟ مفيش فائدة يعنى ولن نحل سلمى ولا حاجة ده بالعكس هيشغلوا عندنا.



## سرى للغاية

وبعدين عملية بيروت إمبراح بتدل حتى إن الأمريكان لا يمكن يستطيعوا الضغط على إسرائيل بل إن إسرائيل هي اللي بتضغط على أمريكا؛ بدليل إن إمبراح خدوا الفانتوم وإمبراح هاجموا مطار بيروت.. وده الحقيقة بيهز وضع أمريكا فى المنطقة كلها لأن معروف إن لبنان هي عبارة عن محمية أمريكية!  
بنسمع كلام الأخ فوزى.

فوزى: أيوه يافندم، هو أنا قدمت مبادئ عامة على أثرها اتحط الأهداف المهمة، وجارى التجميع من المحافظين على أساس إن الأعداد كبيرة ضخمة من الأهداف ماقتنعش بأهميتها من وجهة نظر إسرائيل إلا بعدد ٢٤٢ هدف فقط، اقتناعى بإن إسرائيل متجيش تعمل حاجة فارغة لازم تعمل حاجة تستاهل؛ لأنها مخاطرة قد تتجح وقد تفشل خصوصاً بعد التجربة اللي تمت فى نجع حمادى. وأعلن إن الجيش الشعبى هينشأ وعلى ذلك الـ ٢٤٢ هدف دول هم اللي يعتبروا ذو أسبقية أولى ودرجة حيوية كاملة بالنسبة للشعب، وبصفة خاصة حطيت - زى ما سيادتك بتقول - مصادر المياه هي نمرة واحد ٦٨ هدف، ووراها الكهرباء ٥٣ هدف، ووراها البترول ٢٠ هدف، ووراها النقل ٤٦ هدف، ووراها المواصلات اللي هي اللاسلكى والإذاعة وحاجات المواصلات طلعت ٢٠ هدف، وبالنسبة للمصانع المهمة ٣٥.. كلهم ٢٤٢ هدف. سيادتك عارف إن احنا خدنا إجراء عاجل بالنسبة للحاجة المهمة خالص زى السد العالى وزى أسوان، وبعدين غطينا ضد الطيران الواطى بالنسبة للقناطر المهمة فى الصعيد زى إسنا ونجع حمادى وديروط، وبعدين أخذنا كمان المحطات.

عبد الناصر: ديروط فيها إيه؟

فوزى: فيها الكوبرى فيها قنطرة.

عبد الناصر: أسيوط ولا ديروط؟

فوزى: هي ديروط يافندم وأسيوط كذلك، وبعدين خدنا كمان كإجراء عاجل كل المحطات الـ ٥٠٠ كيلو فولت ده تم فعلا، ويوم ٧ نغطى باقى الـ ١٤٢ هدف بإنشاءات جديدة تمت على كتائب سمينها كتائب الدفاع. وأنا تابعتها بلجنة متابعة فى الآخر وماتبسطش عن كفاءتها القتالية فى الدفاع، فزودت لهم برنامج ٦ أيام عشان يزودوا الـ run بتاعهم وعشان يجيدوا الهدف بتاعهم، فيما عدا ذلك لو تم ٢٤٢ احتلال للهدف نقدر نكون مطمئنين الاطمئنان

## سرى للغاية

الى سيادتك عايزه. بقية الأهداف الأخرى ياتأخذ صعوبة كبيرة فى تدميرها، زى ما بييجى سكة حديد وعرض الكوبرى بسيط، كثافته والحمولة بتاعته الحاجات الللى زى كده تحتاج من المعتدى بإنه يحط المتفجرات ويحفر ويعمل وحاجات زى كده ماتستا هلس.

وبعدين بعض المحافظات كتبت كل الأهداف الللى عندها سواء ليها أهمية أو ملهاش، وسببتى أنا أصنف بين الأهم وبين الللى مش مهم. هى الحقيقة جت الكلمة دى من كلمة اتقالت فى اجتماع المحافظين بإن المحافظ هو الللى مسؤول؛ فمن هنا ابتدت الطلبات تكثر بشكل كبير.

من وجهة نظر القوات المسلحة، الـ ١٤٢ هدف يكونوا متغطيين بكفاءة تامة بالنسبة للهجوم الأرضى وبالنسبة للهجوم الجوى الواطى مثل العملية الللى تمت فى نجع حمادى تماما. وهم الـ ١٤٢ دول اشتربنا فيهم إنهم يكونوا فى تحت نائية زى مثلا بترول العلمين، مناطق القناة، زى فيه تحت مهمة بترول فى طريق السويس بعيد عن العمار، والـ ١٠٠ أقل منهم أهمية وداخلين تحت سيطرة المحافظات.

لاقى اتجاه إن تعبئة الشعب فى معسكرات تدريب وزيادة أعداده شئ غير مجدى وهيحطنا فى مشكل إزاي نتصرف فيه، وأنا شخصيا مانيش مؤمن إنى أوكل هذا العمل لهؤلاء الأفراد.

كانت فيه حملة كبيرة ضدنا أيام المؤتمر القومى، فى إن الشعب مثار والشعب معبأ والشعب عاوز السلاح والشعب عاوز يقاتل! لما جينا للنقطة طب خدوا المهمة الفلانية جينا حطينا المهمة ابتدأت المشاكل تيجى؛ عايزين مرتبات عايزين أكل عايزين ملابس وعايزين مكان إيواء! وبصفة خاصة بمنتهى الطلاقة جه محافظ كفر الشيخ وقال: أنا مش مسؤول عن المصارف دى، فيه ١١ مصرف موجودين فى شمال كفر الشيخ نقينا منهم ٦ وسيينا الباقيين لأنهم ملهمش أهمية كبيرة.

عبد الناصر: مضخات الطرجمات يعنى؟

فوزى: أيوه.. حتى الـ ٦ دول مش قادر يغطيهم! وإذا كان سيادتك تسمح بالإجراء الللى احنا ماشيين فيه مع الأخ حمدى عاشور يمشى مؤقتا، للغاية ما وزير الداخلية بيتدى ياخذ مسؤولية هذه الأهداف الـ ١٠٠ فيما بعد.

عبد الناصر: ده غير الـ ١٤٢، طب دلوقتى إنت هتديله..

## سرى للغااية

فوزى: ال ١٤٢، سيادتك يوم ٧ هادى تمام بانهم أرضى وجوى واطى.

عبد الناصر: هل داخل فيهم قنا وأسوان ونجع حمادى؟

فوزى: كل الحاجات المهمة، على سبيل المثال سيادتك..

عبد الناصر: لا بالنسبة للقناطر؟ كلام ديان إنه أول حاجة هيضربوا فيها القناطر، يعنى طبعا عملية القناطر عملية سهلة؛ يعنى لو كانوا نزلوا فى قناطر نجع حمادى كانوا نسفوها، لكن هم مانزلوش فى قناطر نجع حمادى، هم نزلوا فى محطة الكهرباء، لكن القناطر اتضربت بالطيارة وعشان كده ماتأثرتش. لكن نفس القناطر عملية سهلة جدا، يعنى تاخذها عشر دقائق.. تركيب العملية كله ميخدش عشر دقائق.

فوزى: هقول سيادتك أهداف القوات المسلحة: المنيا فيها محولات كهرباء سمالوط، أسيوط قناطر ديروط.. مجموعة قناطر أسيوط كوبرى أسيوط، سوهاج مفيهاش حاجة قوات مسلحة، قنا محولات نجع حمادى، مجموعة قناطر نجع حمادى، مجموعة قناطر إسنا، أسوان.

عبد الناصر: ده برى وجوى؟

فوزى: أيوه يافندم، محطة كهرباء السد العالى، محطة كهرباء خزان أسوان، خزان أسوان، بصفة خاصة بالنسبة للسد العالى وبالنسبة للخزان ضاعفته ست مرات عن أى هدف عادى، ولبشت حاجات أخرى زى ألغام وأسلاك عقد حاجات زى كده، ومن الأصل سيادتك عارف إن فيها كثافة نيران أخرى كدفاع جوى.

مرعى: القناطر الخيرية؟

عبد الناصر: كلمنا عنها.

## سرى للغاية

فوزى: جاية، أنا سبقت عن سيادة الرئيس قال من أسيوط ومن بنى سويف، البحر الأحمر كله ماعدا محطة مياه خزانات الغردقة.. أربع أهداف: آبار بتترول رأس غارب، آبار بتترول شركة خليج السويس، حقل بتترول مرجان، ميناء الغردقة.. كلهم قوات مسلحة. الدقهلية فيها شوية حاجات مهمة، كهرباء طلخا، محولات بلقاس، محولات جديدة، محولات دمياط، كريم الدين، محطة مياه شربين، محطة مياه كريم الدين، قناطر زفتى، كوبرى سكة حديد المنصورة، الكوبرى البرى طلخا / المنصورة، كوبرى شربين على النيل، كوبرى سمند، كوبرى ميت غمر، كوبرى زفتى، محطة بترا بتاعة الإذاعة. بالذات الحتت دى أنا اعتبرتھا هي الخط الخلفى للجيش، ممكن يعدى وييجى بسهولة ويأخذ الأهداف القريبة له أو..

عبد الناصر: ممكن ييجى من البحر طبعاً؟

فوزى: آه طبعاً، أو ممكن يدوخنا استراتيجياً وييجى ناحية الغرب خالص، زى الأخبار اللى جت بالنسبة لمطروح وبالنسبة للعلمين، وهو قصده تشتتت فكرنا بالشكل اللى بيها نوزع أكثر. الشرقية فيها محولات وفيها عملية مياه العباسة وفيها المفاعل الذرى بانشاص، بورسعيد واخدينها كلها، الإسماعيلية واخدينها كلها، السويس واخدينها كلها فيها أهداف كثيرة. إذا كان فيه من ناحية الأهمية شئ أكثر من هذا ممكن نضيفه على القوات المسلحة بس يكون بدرجة الأهمية ليھا.

عبد الناصر: دلوقتى إنتو عملتوا كتائب جديدة؟ طيب دى هتكون خالصة إمتى؟

فوزى: يوم ٧ بالنسبة لهذه الأهداف الـ ١٤٢ هدف.

عبد الناصر: ١٥ كتيبة؟ ولا..

فوزى: لا يافندم ٥ بس.

عبد الناصر: هو أنا رأى نزود، ولا إيه؟ يعنى هو أنا بعتر إن جيش الدفاع الشعبى عملية يمكن مش هتدى نتيجة سريعة، وبرضه اللى متهيألى هندخل فى صدام مع اليهود قريب. فهو أنا عندى فكرتين..

## سرى للغاية

إتكلمت مع فوزى على إحنا بنعمل كتائب زى الصاعقة ولو حتى هنسميها نص صاعقة كده بينا وبين نفسنا اللي هى هتقوم بالعمليات دي؛ لأن هو أهدافنا الحقيقية كتيرة جدا وممكن يضرنا ويسببنا خسائر كتير جدا.

وبعدين برضه إتكلمت مع شعراوى على أساس إنه هو أيضا بالبوليس بيقدر - عنده هو صاعقة - بيقدر ياخذ من الجيش، اللي أنا فاهمه إن شعراوى هياخذ أول الشهر ٦,٠٠٠؟

فوزى: مستجدين و ٣,٠٠٠ نقل.

عبد الناصر: من اللي تموا الخدمة؟

فوزى: أيوه يافندم، أنا عندى ٣٥ ألف فرد هيجصلوا ٥ سنين، اللي سيادتك شفت مشاكلهم اللي موجودين دول، هو عاوز ٣٠٠٠ هنقل له ٣٠٠٠ نقل داخلى من القوات المسلحة الى الداخلية.

عبد الناصر: ممكن تبديله أكثر؟ أنا فاهم إن عندكم عساكر أكثر؟

فوزى: لا يافندم، أنا مكملتش لسه ٣ فرق، ماشى على ٩٥٪ ومن هنا جه القرار اللي سيادتك وافقت عليه بإن احنا منخرجش حد؛ يعنى أنا ماستكملتش لسه أقدر فيما بعد، يعنى أنا خططت على كده دلوقتى.

جمعة: ال ٣٠٠٠ دول ياخداهم للحراسة.

عبد الناصر: طب الأسلحة؟

جمعة: هو هيدينى.

عبد الناصر: طب القناطر الخيرية إنتم ماسكينها؟

فوزى: أيوه يافندم.

## سرى للغاياة

عبد الناصر: دلوقتى أرضى وجوى؟

فوزى: أيوه يافندم، جوى كهدف منفصل لوحده.

عبد الناصر: أنا شفت عليها مدافع مضادة للطائرات.

فوزى: خمسة يافندم.

عبد الناصر: الحقيقة، يبقى القناطر كلها متغطية جوى وأرضى؟

فوزى: أيوه يافندم.

عبد الناصر: بأسلاك وعمليات؟ كل الدفاع؟

فوزى: ونقط على المياه على مراكب ودرجة استعدادها كبيرة.

عبد الناصر: آه يعنى بالليل، هو المهم المرور بالليل هو اللي هيعمل عملية هيعملها بالليل. وأنا فى رأى إنهم لما هيعملوا عملية هيعملوها فى الصعيد، مش هيجيوا فى الدلتا إلا إذا جم لأهداف قريبة من البحر؛ لأن هم طبعا عارفين إن العملية فى الصعيد سايبة فى الصعيد عندنا الحقيقة حاجتين مهمين..

أولا القناطر.

ثانيا الكبارى.. الكبارى بتاعة السكة الحديد، والكبارى بتاعة العبور. وأنا طلبت

من الأخ وزير النقل يجهز لنا بيان بالكبارى غير الكلام بتاع الأخ حمدى.

هو فى الصعيد فيه نبتدى من الجيزة ٣ كبارى سكة حديد، الفيوم قناطر وأنفاق،

بنى سويف كوبرى سكة حديد و ٢ قناطر وأنفاق، أسيوط ١ كوبرى سكة حديد و ٢ قناطر

وأنفاق - ده كلام حمدى - سوهاج ١ كوبرى سكة حديد و ١ قناطر وأنفاق و ١ كوبرى عبور،

قنا ٢ كبارى سكة حديد و ٢ قناطر وأنفاق، أسوان ١؛ فالحقيقة هو كهدف فى عمليات

الصعيد أى حته هيقدر ينزل فيها.

## سرى للغاية

فوزى: مش على النفق يافندم يحطوا هدف أبدا.

عبد الناصر: نفق هنا يعنى إيه؟ يعنى إيه نفق؟

فوزى: زى البرزخ.. زى البرزخ.

صالح: سكة حديد ويمر تحتيه طريق.

عبد الناصر: زى اللى هنا ده اللى عند ترعة الإسماعيلية، لأن هم عملوا فى الأردن العملية اللى عملوها فى الآخر فى الأردن، ضربولهم السكة الحديد والطريق اللى ماشى على أنفاق؛ ضربوه فى حنتين اللى هى عبارة عن قناطر قديمة. هو الحقيقة اللى أنا متصوره إن احنا لازم نغطى أولا كل الكبارى والقناطر.

صالح: والله لى رأى يافندم فى الكبارى اختلف حبة فيه، إن الكبارى لما يكون كبير زى الكوبرى الطويل زى الكوبرى القصير؛ لأن بعد ٤٧ كنت زرت البلاد اللى فيها المعارك حصلت، لقيت إن مابينسف الكوبرى كله الطويل بينسف باكية واحدة منه فبرضه القصير هينسف باكية واحدة منه. هو الفكرة كلها إنه يجيب عائق للسكة الحديد ماتتحركش؛ فالكوبرى مناخدش على أساس الكوبرى طويل أو قصير آخذ على إنه طالما فيه باكية يقدر ينسفه يعمل عائق للسكة الحديد؛ لازم أحميه سواء كان طويل أو قصير لأن القصر مبيأثرش فى أولويته أوى.

عبد الناصر: برضه أنا فى ٣٩ كنت بحمى كوبرى التوفيقية، اللى يعنى الخطة اللى كانوا عاملينها الإنجليز.

فوزى: كانوا هو وكفر الزيات محترمين.

عبد الناصر: لا، كانت الكتبية فى كفر الزيات، فصيلتى أنا كنت فى التوفيقية.. يعنى قاعد هناك فى محطة التوفيقية وماسك الكوبرى اللى هناك فى التوفيقية، وكان كل الجيش ماسكين العملية سنة ٣٩، وكان فى العملية اللى هو مشروع المرافق الحيوية. النقطة السؤال.. هل هو هيقدر يدخل فى الدلتا ويعمل عملية بالهليكوبتر؟ ده السؤال الأول.

## سرى للغاية

فوزى: يقدر.. فى أى مكان فى الجمهورية.

عبد الناصر: من غير ما نحس بيه؟

فوزى: أيوه.. وأنا عشان كده اضطريت أعمل القاهرة، خدت من أول طريق القاهرة الإسماعيلية الصحراوى الكيلو ٣٦، وجيت عامل perimeter عدى طريق السويس الجبل الأحمر القلعة، ورا القلعة لغاية ما وصلت للتبين.

عبد الناصر: حلو ده.

فوزى: نقط انتظار ضابط بعربية باتنين جهاز لاسكى، سيادتك تلاقهم دلوقتى عدد هم ١٧ واحد مربوطين بفصائل خلفية وراهم من نفس وحداتهم. ساعدنى العملية فى إن المعسكرات الناحية دى ما حتملتش ناحية غرب القاهرة لأن فيه عوائق أصلا، هو بييجى عايز حنة صحراوية ينزل فيها على مسافة ٥ كيلومتر؛ ينزل الجنود بالعربية بالخمسة كيلومتر علامات مصرية لبس مصرى، يوصل زى ما هو عايز الطيران.. الواطى يوصل لأى حنة.

عبد الناصر: يعنى يقدر يعمل عملية على المطار.. مطار القاهرة الدولى.

فوزى: ما أنا أيضا نزلت سرية مدرعات فيه إمبراح، كتيبة مظلات.

هويدى: ١٦ كيلومتر.

عبد الناصر: ماهو مبهوق أصلا الحقيقة.

فوزى: لا يافندم، سبع دقائق إنذار ومتمركزة فى المطار القديم، وكتيبة مظلات ٢٥٪ منها سبع دقائق إنذار. وبعدين من الأصل المطار نتيجة وجوده جنب مطار ألماتة فده فى دايرة الدفاع الجوى العالى والواطى.



## سرى للغاية

عبد الناصر: لا.. هو الكلام اللي جاى من بيروت النهارده، إن اللبنانيين افتكروا الطائرات بتاعتهم بتاعة الجيش، ونزلت الطائرات فى المطار وابتدوا رموا قنابل دخان وقسموا بعضهم أربع مجموعات قفلوا طريق الإمداد؛ مجموعة نقفل طريق الإمداد و ٣ مجموعات رايعين على الحنت اللي عارفينها، خلصوا العملية ومشبوا.

يعنى عملية بهذا الشكل، الحقيقة إحنا مابنقدرش نعمل العملية دى فى اسرائيل؛ لأنه هو بيقدر بيجلنا من شرق القتال ويعمل العملية دى فى أى وقت.

فوزى: عامل جديد آخر، كل التحضيرات دى كويسة بتزول وبتبقى صفر لو درجة الوعى ودرجة الاستعداد للقتال وحشة، لو الفصيلة موجودة على هذا الكوبرى ومفیش نظام خدمة مضبوط بتنام والعمل يحصل، والمهم كفاءة الناس اللي بتدافع عن الحاجة تكون مضبوطة.

عبد الناصر: لا.. هو طبعا الفكرة فى الجيش الشعبى ووضع الناس، إن اسرائيل مبيقاش عندها معلومات إن مفیش حاجة سايبة لانهم هيدوروا على الحاجة السايبة ويصطادوها، وبعدين أيضا هيدوروا على الحاجة اللي يقدرنا ينزلوا جنبها؛ يعنى مثلا بتكلم على حلوان، يقدر ينزل حلوان فيه حنت سهلة أوى ينزلوا فيها فى حلوان ويدخل على منطقة المصانع فى حلوان.

فوزى: محطوطة فى الخطة، وهو المهم طلقة تطلع.

عبد الناصر: ها؟

فوزى: طلقة تطلع.

عبد الناصر: آه.. الناس تضرب يعنى؟

فوزى: آه.. ده الغرض يعنى، أنا بقول لو تم توزيع السلاح النهارده بالأفراد اللي اتدربوا وفيه اتنين ضباط لكل هدف، فأنا دافعهم مع المدنيين اللي هم خلصوا والسلاح موجود، فترة انتقال لحين تغيير الفرد من مدنى الى شرطة أو جيش عشان مانأخرش العملية، المهم بس نضمن على الـ ٢٤٢ يوم ٧ أو يوم ١٥ زى ما الأخ حمدى بيقول إنهم محتلين بواسطة ناس.

## سرى للغاية

عبد الناصر: دلوقتي الـ ٢٤٢، إنت واخد ١٤٢ الشرطة هتاخذ ١٠٠؟

فوزى: لا يافندم، منظمة الدفاع.

عاشور: المفروض فى المنظمات.

فوزى: ده الاقتراح الجديد، ده التعديل الجديد اللي لسه هنفذه فأنا بقول منتأخرش فى الاحتلال.

عبد الناصر: لا.. أنا رأيى الشرطة أحسن، إنما أنا رأيى إن الجيش الشعبى فى العملية الحالية عظمه طرى جدا ومش هيعملوا حاجة وإذا جت عليهم عملية هيجروا!

عاشور: والله يافندم أنا كنت شايف حضرتك مهتم بوجه قبلى وبتتكلم إن ممكن ينزلوا لنا من البحر، أنا بقول: إن محطات الصرف بتشكل خطورة كبيرة.

عبد الناصر: نعم؟

عاشور: محطات الصرف خصوصا فى كفر الشيخ، إذا كان الأخ فوزى يشوف الموضوع تانى وندى أسبقية لمحطات الصرف؛ لأن ده ممكن يتغرق فى الدلتا فورا وحتة نائية خالص بعيدة فى الهو واستصلاح أراضى، وهناك المواطنين غير صالحين خالص للدفاع عن المنطقة دى، وبرضه أنا قاعد بفكر فى البحر على أساس إن كفر الشيخ منطقة معزولة وتديهم أهمية للنزول.

عبد الناصر: كام هم المحطات؟

عاشور: ١١ يافندم هناك على طول الساحل، إنما إحنا مهتمين باتنين أقرب من البحر.

عبد الناصر: نعم؟

عاشور: إحنا مهتمين باتنين فى كفر الشيخ بالذات.

## سرى للغاية

بدوى: ستة.

عاشور: أفندم؟

بدوى: هو فى الحقيقة يعنى محطات الصرف اللى فى كفر الشيخ مفيش حاجة أبدا وراها إلا البحر.. بحيرة البرلس، وفى منطقة نائية يعنى جائر أى مواصلات ماتقدرش توصل لها.. محطة صرف نمرة ٧، ٨، ٩، حتى بطريق المواصلات لا سيارات تعرف توصل لها.. لحد دلوقتى مفيش مواصلات تعرف توصل لها، وزى ما بنسمع إذا أصيبت بأضرار ممكن إن هى تتسبب فى ضرر كبير فى الدلتا كلها. ومفيش ناس هناك يعنى فى الحتة اللى هى فيها دى خالية جدا من الناس، حتى مفيش فلاحين قريبين منها لأن مفيش وراها إلا بحيرة البرلس على طول، وخصوصا طرق المواصلات لها يعنى حتى أى سبيل للنجدة لها مش ممكن إلا إذا كان فيها حراسة محلية.

عبد الناصر: أيوه يافوزى.. إنتو واخدين كام محطة؟

فوزى: ولا واحدة يافندم.

عبد الناصر: مفيش؟

فوزى: آه.. أنا اعتبرتهم حاجة شعبية ممكن تتغطى، أنا ماشفتش ولا واحدة منهم بس قريرت الورق اللى بيقول ده يعمل كذا فدان وده يعمل كذا فدان، وكل واحدة عليهم فصيلة من فصائل الدفاع الشعبى.

عبد الناصر: عليها دلوقتى؟

بدوى: مفيش حاجة هناك.

فوزى: متخططة يعنى، يعنى كفر الشيخ فيها محطة طللمات صرف ٨، محطة صرف البرلس محطة طللمات صرف ٤، محطة صرف مصرف ١١، محطة صرف الزينى محطة صرف ٧، محطة صرف زغول محطة صرف مصرف ٣، محطة صرف مصرف ٦،

## سرى للغاية

محطة صرف المنذرة نيرة وكوبرى دسوق داخل معاها. فى محافظة دمياط فيه سد دمياط، ومحطة صرف رقم ١ ومحطة صرف فارسكور، فى البحيرة فيه محطة رى العطف، محطة صرف البوصيلى، محطة صرف البرميق، ومحطة صرف حلق الجمل، وكوبرى إدفينا وكوبرى التوفيقية العلوى. إذا كان سيادتك تتكرم وتحولهم على القوات المسلحة يبقى هتاخذ وقت للغاية شهر ٤.

جمعة: محطات صرف كفر الشيخ إحنا ممكن نغطى الاتنين دول.

عبد الناصر: إنت هتاخذ ٣ آلاف عسكرى بعد بكره أنا فاهم أو آخر الشهر.

فوزى: لا ده لسه مدتش أوامر، ده النهارده بس بنتفق.

عبد الناصر: هو أنا الحقيقة تصورى الآتى: إن احنا فى الجيش بنزود كتائب الدفاع، لأن عملية برضه الجيش الشعبى بطبيعتنا إن الناس هتتحمس وتفور وبعدين تبص هتلاقى بتهبط، وبعدين هيبقى الحضور هيقل ونبندى نحاكم فى الناس؛ فبناخذ العملية الحقيقة بصيغة جدية أكثر، نمشى فى عملية الدفاع الشعبى والكلام ده لكن ننشئ كتائب دفاع. وأنا كان رأبى من زمان إن احنا هحتاج لهذا، يعنى إحنا عندنا قوة دلوقتى تساوى ٣٥ لواء.

فوزى: أيوه.. مش ماسسهم بحاجة.

عبد الناصر: آه.. يعنى مش هنعدى بيهم، عندنا ٣٥ لواء فقدا منا حاجتين.. يا نستدعى الاحتياطى، ومعرفش إيه قيمة الاحتياطى، هل هيجرى ولا يقعد؟!

فوزى: لا.. وحش.

عبد الناصر: هيجرى يعنى!

فوزى: خدنا التجربة وما نكرهاش تانى، نزود الكتايب وأخد الـ ١٠٠ هدف دول التانيين.

## سرى للغاية

عبد الناصر: هتأخذهم بتقول فى شهر ٤؟

فوزى: آه.. أنا بقول: فيه حل عاجل دلوقتى.

عبد الناصر: ما هو برضه السؤال.. هل إحنا هنفضل قاعدين لحد شهر ٤ مبنشتغلش؟ يعنى أنا رأيى إن احنا لازم نشتغل فى منطقة سينا ونبتدى العملية بهذا الشكل، وإلا هنفضل نأجل. إحنا كان مفروض ميعادنا كان يناير السنة دى.. الحقيقة كان اتفاننا إن فى يناير ٦٨ نبتدى نشتغل، وأنا مرة قلت فى مجلس الوزراء هذا الكلام، وبعدين الحقيقة العملية ثبت إنها عملية صعبة؛ لأن عملية الدفاع الجوى كان مستحيل ربطها زائد عوامل كثير جدا دخلنا دلوقتى على يناير ٦٩! فقعادنا ساكتين كده ممكن مش هيوصلنا أبدا لنتيجة.

يعنى لازم طبعا فى رأيى نبتدى عمليات محدودة فى داخل سينا، وهنضرب ولازم نستحمل إننا هنضرب مقدمناش سبيل غير كده، ولازم ناخذ فى حسابنا إن يمكن قُصاد كل يهودى هنضحي بتلاتة أو أربعة مصريين، ولازم يبقى فيه جرحى يهود موجودين فى تل أبيب والقدس نتيجة العمليات اللي موجودة فى سينا حتى عشان الحل السلمى يمشى. يبقى نتيجة هذا إن يحصل علينا عمليات، ناخذ أولا الاحتياط وبعدين هنضرب، إنجلترا فضلت تنضرب فى معركة بريطانيا من ٣٩ لغاية ٤٥ يعنى قعدوا ينضربوا، وهجروا أولادهم ودوهم كندا.. الأطفال ودوهم كندا علشان يحافظوا عليهم. فنفرض إن احنا مثلا هنبتدى فى يناير مثلا.

فوزى: ما هو إذا كان الحل بتاع ٣ آلاف شعراوى ياخذهم ١٥ يوم يوزع وياخذ الـ ١٠٠ هدف التانيين.

عبد الناصر: يعنى أنا رأيى شعراوى ياخذ الـ ١٠٠ هدف التانيين ياخذهم بس تديله سلاح؛ لأن اليهود اللي هيجوا مش هيجوا ببنادق هيجوا برشاشات يبقى إذا تديله رشاشات.

فوزى: مغطى يافندم السلاح نفسه خمس رشاشات و ٢٧ بندقية لكل هدف، موجودين دلوقتى عند..

## سرى للغاية

عبد الناصر: رشاش قصير ولاّ خفيف.

فوزى: قصير.

عبد الناصر: آه.

جمعة: هو سيادتك التوجيه دلوقتى نمشى فى الهدفين الحقيقة؛ لأن مش عايز أوقف الجيش الشعبى الحقيقة.

عبد الناصر: لا.. منوقش لا.. بس هو أنا رأيى دلوقتى إن الجيش الشعبى زى قلته، يعنى ممكن لما نستنى الجيش ممكن نقعد سنة على أساس لما نقول الجيش الشعبى مش هيجرى، أنا يعنى متصور إن الناس أول لما هيشوفوا اليهود هيجروا!

جمعة: أنا بقترح إن سيادة الفريق يدينى ٣٠٠٠ عسكرى ويدينى تسليحهم وأنا باخد الـ ١٠٠ هدف، وفى الوقت نفسه بنمشى فى تدريب الجيش الشعبى والأسلحة الموجودة فى المحافظات بتسلم إليهم وهم بياخدوا الأهداف اللي بعد الـ ١٠٠ هدف؛ وبذلك يبقى حققنا الهدفين معا اللي لو سيادتك النهارده ادبتتى الأسلحة اللي موجودة والـ ٣ آلاف عسكرى.

عبد الناصر: لا.. إحنا هنمشى فى الجيش الشعبى لازم نعتمد برضه على الجيش الشعبى، وأنا رأيى إن دلوقتى الجيش الشعبى يعنى مثلا الجمعة الجاية أو الشهر الجاى مش هيقدرنا يصدوا يهود أبدا فى عملية لأن اليهود هيبعتوا كوماندوز.. يعنى كوماندوز يعنى إيه يعنى بتوع المظلات؛ فقصد الجيش الشعبى العملية بالنسبة للأهداف الحيوية دى مستحيلة، والعملية إذا كنتوا إنتو بتاخذوا الـ ١٠٠ هدف وبيدوكوا سلاح، مش عندكم سلاح؟

فوزى: أيوه يافندم.

عبد الناصر: ورشاشات light؟ إنتو عندكم بنادق؟

## سرى للغاية

البشرى: عندنا يافندم.. عندنا رشاشات بورسعيد، ونقدر نعمل رشاشات تانية الخامة بتاعتها موجودة.

عبد الناصر: آه.

فوزى: مفيش مشكل بالنسبة للطلب ده.

عبد الناصر: الأسلحة يعنى، طيب يبقى معنى هذا إن هل الكبارى السكة الحديد كلها متغطية فى الـ  
٢٤٢؟

فوزى: لا يافندم، يعنى سبت كلمة الأنفاق.

عبد الناصر: لا.. لا.. أنا مبتكلمش الأنفاق، أنا بتكلم فيه حاجة اسمها كبارى وفيه حاجة اسمها أنفاق،  
يعنى كبارى السكة الحديد هم ٣٨ كوبرى، مش كده يا حمدى؟

عاشور: أيوه يافندم.. إذا سمحت لى سيادتك أوضح الكلام تانى.

عبد الناصر: آه.

عاشور: يعنى عندنا كبارى عبور فى القاهرة بس ٣٢ كوبرى عبور و ١٠ سكة حديد، إسكندرية ١٩  
كوبرى عبور ٤ سكة حديد، بورسعيد ١ و ١، إسماعيلية ٩ - صفر، السويس مافيهاش،  
القليوبية ١٠ - ٦، المنوفية ٩، الغربية ٢، كفر الشيخ ٢ سكة حديد، الدقهلية ١٢ كوبرى  
عبور و ٦ سكة حديد، الشرقية ٢ وصفر، دمياط ٢، البحيرة ٦ وواحد، الجيزة ٥ و ٣، الفيوم  
مافيهاش إلا قناطر واحد، بنى سويف ١ كوبرى عبور و ١ سكة حديد و ٢ قناطر وأنفاق،  
المنيا ١ كوبرى عبور، أسيوط فيها كوبرى سكة حديد و ٢ قناطر وأنفاق، سوهاج فيها  
كوبرى عبور و ١ سكة حديد و ٢ قناطر وأنفاق، قنا مافيهاش عبور فيها كوبرى سكة حديد  
و ٢ قناطر وأنفاق، أسوان فيها قناطر وأنفاق واحد؛ البيان ده يدى مجموع ١١٢ كوبرى  
عبور، ٣٨ سكة حديد، والقناطر ٥٢.

## سرى للغاية

يا فندم السيد وزير الري غايب فيه عنده حوالي ٢٥١ محطة صرف؛ ودى برضه بتشكل خطورة ضخمة فى الصرف، عندى بيانهم وأسبقياتهم فلو تكلمت بكره وإحنا الأسبقيات لو ٢٤٢ نقدر نزودهم شوية ندخل فيهم محطات الصرف. حكم خطورة محطة الصرف زى سد أبو قير بالضبط، بقول إن حكم الخطوة اللي هتيجى من ضرب محطة صرف نائية فى شمال الدلتا نفس الخطوة بتاعة سد أبو قير؛ يبقى لها لازم أسبقيات أولى كمان، ولو اللي على الأطراف فوق.

عبد الناصر: هو قطعاً مش ممكن ينزل ويبقى ينسف كوبرى قصر النيل، لأنه هينزل فين؟!!

عاشور: سيادتكم قلت هينزل فى حلوان يا فندم.

عبد الناصر: لا.. أنا بقول على ما ينزل فى حلوان وهيدخل مثلاً يضرب مصانع هناك مصانع حلوان وكوبرى التبين المناطق اللي هناك، تحت النزول.. ما هو هندور تحت النزول فين؟ يا إما ينزل هنا فى الصحراء جنب المطار ويضرب يا إما ينزل فى الصحراء فى المعادى ورا شركة السيارات مثلاً، يا إما يعنى عمليات النزول لازم يكون فيه حته ينزل فيها لأنه إذا وقع فى سلك تليفون ولا بتاع هتبوظله العملية إذا نزل فى سلك. مش ممكن كوبرى قصر النيل ولا كوبرى الجامعة؛ هينزل فين ده دى عمليات تخريب يعنى بيعت ناس مخربين اللي بنتكلم فيهم، لكن الحقيقة وإحنا بنحسب بنحسب إنه ينزل.

بالنسبة للصعيد بقى بالنسبة للوادي، بيقدر ينزل الحقيقة فى أى حته ويبدل بيوصل للسكة الحديد ويعمل أى عملية. بالنسبة لإسكندرية فهو ممكن ينزل فى منطقة الدخيلة، فيها مناطق أرض مفتوحة منطقة الدخيلة وبيبقى عنده المصانع اللي موجودة فى الماكس.. مصنع الكلور والعمليات اللي موجودة هناك. وهم حاطين برضه من ضمن أهدافهم مصنع أبو زعبل ومصنع إسكندرية؛ على أساس إن ممكن المصنعين دول يسببوا خسائر مدنية فى الناس، وجتلتنا معلومات بهذا.. مصنع أبو زعبل بتاع ايه؟

فوزى: بتاع سماد والحديد والصلب وسوبر فوسفات.

عبد الناصر: أظن فيه كلور ولا لا؟



## سرى للغاية

أصوات: آه.. يافندم.

عبد الناصر: على أساس إنه هيسبب خسائر كثير فى الأهالى!

صدقى: إسكندرية فيه معمل التكرير يافندم وده قريب من الصحراء بتاعة الدخيلة، ومحطوط فى أولوية أولى.

فوزى: والكور والحبوب داخل الميناء؛ الميناء كلها كثافتها رقم ٢ بعد السد العالى.

عبد الناصر: أنا رأى إن عملية الضرب الجوى مهياش مؤثرة بالنسبة للأهداف دى، إلا يعنى ممكن تأثير جزئى، لكن هو العملية الحقيقة لو هم راحوا؛ وأنا شفت صور لديان ماشى مع الأمريكان فى فيتنام وراح قعد هناك وشاف استخدام العمليات الهليكبتر وطياراتهم مسلحة بصواريخ مضادة للدبابات وصواريخ ومدافع رشاشة، وابتدوا عملوا العمليات دى فى نجع حمادى ونجحت، وابتدوا إمبارح عملوها فى بيروت ونجحت جدا؛ فطبعا هيستعملوها على طول يعنى.

فوزى: بس لازم تأمين للطيارة الهليكبتر، يعنى الحطة الللى ينزل فيها لازم تكون فاضية زى ماسيادتك قلت.

عبد الناصر: آه.. لازم تكون فاضية.

فوزى: ودى أهم له من الأفراد لو الأفراد جرالهم حاجة، لكن وسيلة المواصلات هى الأهم.

عبد الناصر: عشان يرجع، لذلك هو ممكن ينزل جنب الهايكستب مثلا، ممكن ينزل فى حلوان، ممكن ينزل فى المعادى، ممكن يروح محطة الكهرباء الللى قبل المعادى عملية سهلة، محطة الكهرباء الللى عندنا هنا الللى على ترعة الإسماعيلية صعب يوصل لها لأنه هينزل فى عشان يوصل لها؟ هى الحقيقة العملية عايزة نتبث بهذا الشكل، وإلا هنبص نلاقى نفسنا فعلا قصادنا ٢,٠٠٠ - ٣,٠٠٠ هدف بنحتر فىهم، لكن الحقيقة لازم نحسب هينزل فىين ويروح فىين؟

## سرى للغاية

هو العملية اللى أنا متصوره إنه هيعملها وهو فى هذا بيمثل طبيعته، إنه هيروح على أى كوبرى فى الصعيد ويضربه أو قناطر فى الصعيد ويضربها؛ على أساسه يعرف إن احنا معندناش دفاع جوى فى هذه المنطقة. ولهذا منطقة الصعيد بنى سويف أسوان الكبارى والقناطر لازم يكون ليها أسبقية أولى، وتنسقوا إنتو والداخلية مين ياخذ ده ومين ياخذ ده على أساس إن يتم هذا قبل يوم ٧. ويبقى موضوع إنه كونه بييجى من البحر وينزل ودى طبعا أسهل عملية ده ممكن يعملها بالنهار.. إذا كان عنده معلومات إن مفيش حد ممكن ييجى بالنهار.. إذا كانت المناطق زى ما بيقول الأخ بدوى إنها مهجورة ومافيهاش حد خالص ييجى بالنهار وينزل.

صوت: هى دى النقطة.

عبد الناصر: هم فى هذا هيفكروا صح جدا ويحسبوا العملية.

فوزى: لكن بالليل أمن لهم ويعملها سيادتك على أساس إنه عنده معلومات كافية، يعنى تأمين الطائرة بقت نمرة واحد بالنسبة له.

عبد الناصر: عشان يرجع.

فوزى: آه.

جمعة: ما إحنا لازم نقوى يافندم المراقبة الجوية، اللى هى المراقبة بالنظر فى هذه الأماكن.. فى الكثير من الأماكن وللازم يتأمن عليها.

فوزى: موجودة على نسقين بالنسبة للشاطئ الشمالى كله.

عبد الناصر: آه.. لكن إحنا جالنا تبليغ عن الهليكبتر راح نجع حمادى بس بعد العملية!

فوزى: أيوه.. ما هو البحر الأحمر مكانش متغطى كله يافندم، يعنى إحنا مانزلناش تحت إلا قريب بعد نجع حمادى.

## سرى للغاية

عبد الناصر: هو دلوقتى هل محطات الكهرباء داخله فى الدفاع؟

فوزى: ٥٠٠ كيلو فولت أبوه.

سليمان: هى محطات الكهرباء عموما بنعتبرها من الأسبقية الأولى، فيه بعضها متغطى فى نطاق الدفاعات وفيه بعضها جارى تغطيته عن طريق المقاومة الشعبية.

عبد الناصر: هو أنا برضه بقول بالإضافة الى الـ ٢٤٢ هدف وبصرف النظر أيضا عن المحافظين والعمليات دى كلها، الوزراء مسؤولين عن المقاومة الشعبية فى المصانع.. يعنى دلوقتى كل مصنع فيه وردية وانتين أو أكثر أوقات بتقولوا فيه زيادة فى العمالة؛ ممكن ناس من دول بيقتوا يتفرغوا، وقطعا فيه ناس مضوا الخدمة العسكرية أو كانوا فى الحرس الوطنى. وفى كل مصنع بالذات فى منطقة حلوان لازم يكون فيه مقاومة شعبية، ويندى العملية دى عملية أساسية بصرف النظر عن الأهداف اللي واخدها الجيش أو الداخلية. وأيضا أبو زعبل منطقة صالحة للنزول، أنا كنت هناك وعارف المنطقة كلها صالحة للنزول منطقة أبو زعبل، معرفش الجيش واخدين إنتو حاجة هناك؟

فوزى: لا يافندم، أنا غطيت شرق القاهرة زى ما قلت لسيداتك بس.

عبد الناصر: لا.. المصنع اللي فى أبو زعبل؟

أصوات: المصنع، السماد، الإذاعة، وأبراج الإذاعة كمان والأبراج الهوائية.

عبد الناصر: هل فيه دفاع؟

البشرى: فيه حنتت لحقناها وقسمنا الدفاع، الحراسة بتاعة المصانع بنزودها لـ ٣٠٠ واحد.

فوزى: لأن الحراسة الداخلية.. لأن أنا دلوقتى فيه نقطة إنذار بره وفصيلة وراها.

## سرى للغاية

عبد الناصر: فى أبو زعل؟

فوزى: فى كل الدائرة اللى وصفتها لسيادتك دى، أصل هى القعدة خدمة.

عبد الناصر: وعربيات؟

فوزى: راكبة وبالتسليح بتاعها بالكامل، ورابطة مع نقطة الإنذار بتاعتها، وقطاعات كل شرق القاهرة من أول الدلتا جنب يعنى مدخل..

عبد الناصر: أنا متهيألى إن ده مش كفاية، لأن قطعا الفصيلة إذا نزلوا اليهود قطعا الفصيلة هيقعوا فى كمين؛ يعنى بالطريقة اللى هو إذا نزل ودخل بيوقف عشان اللى رايح يقع فى كمين.

فوزى: لا يافندم، ده معلومات من نقطة الإنذار الأول، دى عربية وقاعدة مستخبية فيها ضابط و ٢ لاسلكى؛ واحد منهم رابط مع الفصيلة اللى وراه. والتانى رابط مع قيادة المنطقة، وهيقول له مكان هبوط الهليكبتر.. أنا رسمت على كده ويس.

عبد الناصر: لا.. نفرض إنه مصنع أبو زعل هيطلع، الفصيلة هتروح على مصنع أبو زعل؟

فوزى: لا.. هتروح على الطيارات.

عبد الناصر: هتروح على الطيارات؟

فوزى: هتسيب الناس يدمروا المصنع.

عبد الناصر: لأنه هو اذا كان رايح المصنع لازم بيعمل كمين للسكة عشان..

فوزى: لا.. ماخذتهاش على كده، واعتمدت على الحاجة الداخلية اللى مبنية بناء تانى على الشئ الداخلى جوه المصنع.

## سرى للغاية

عبد الناصر: يبقى إذاً لازم كل مصنع يعمل المقاومة الشعبية، وعازين الحقيقة الكلام ده يتم بسرعة ومنعتمدتش فيه على حمدى؛ يعنى تسيبوا شغلكم وورقكم وكل حاجة وتنزلوا المصانع ويتشوفوا التدريب وتصرفوا سلاح من فوزى، عندك سلاح؟ معندناش سلاح بنطلب سلاح من الروس بيعتوا لنا بالطيارات.

فوزى: كل الطلبات ممكن تجاب، بس عن طريق واحد نسلمه الفرد يعنى.

عبد الناصر: يعنى بتسلم إنت شعراوى؟

فوزى: أنا عاوز كده.

عبد الناصر: إنت بتسلم شعراوى وهم هتصلوا يطلبوا من شعراوى وشعراوى مع حمدى ينسقوا، لكن برضه باجى أقول محافظ القاهرة مسؤول عن المصانع. عندى أنا كام مصنع فى حلوان؟

صدقى: كتير ده بييجى ٨٠ مصنع.

عبد الناصر: طيب دلوقتى يعنى عملية الفصيلة والبتاع ده مش هتتفع، يعنى لازم كل مصنع يبقى فيه دشمة معمولة فى الركن أو دشمتين أو ثلاثة أو أربعة، وبالليل قاعدين فيها وحاطين أكياس رمل ومستخبين وواحد قاعد بالرشاش والتانى قاعد بالبندقية؛ هى دى العملية الحقيقة.. هو ده اللى لازم نعمله فى كل المصانع بتاعتنا، لكن أنا برضه استفسرت إن الفصيلة هتروح على المصنع؛ إذا كان الفصيلة هتروح على المصنع يبقى اليهود هيخلصوا عليها فى السكة.

فوزى: أنا قصدت الطيارات.

عبد الناصر: لأن.. هو لازم من جوه المصنع يجب مقاومة، وبعدين إذا دعى الأمر الى إن احنا نعمل حوالين المصنع أى عوائق؛ ممكن نعمل خندق ممكن نعمل سلك ممكن نعمل أى عملية من العمليات.

## سرى للغاية

فوزى: كبيرة يافندم أوى، لو نقطة إنذار أفضل من الكلام ده كله، لو المصنع طلع منه من طرق الاقتراب اللى جاية عين أو وذن وامتصل بالناس اللى جوا أفضل.

عبد الناصر: هتضمن؟

صوت: والله بيقوا صاحبين لدرجة الاستعداد اللى بنقول عليها.

عبد الناصر: يعنى هو الجيش الشعبى فى رأى أنا مش هيبقى صاحى؛ إذا كان الجيش العامل مكانش صاحى! (ضحك) يعنى الحقيقة لا نطلب منهم أكثر من.. هو إحنا الحقيقة لازم نثير حماسهم وبببقى فى كل مصنع واحد مسؤول عن العملية دى، وممكن إذا كان فيهم ناس متدربة ممكن يتولوا القيادات. تدريب سياسى أهم لأن العملية السياسية اللى ماتخليش يجرى؛ لأن هو دلوقتى إن كل هدف معرض للضرب، فعندنا إذا غطينا الكبارى وغطينا القناطر وغطينا المصارف وغطينا المحطات بتاعة السد العالى اللى هى المحولات كله متغطى. وبعدين محطات الكهرباء، عندنا اللى هى المحطة اللى فى طريق حلوان جنوب القاهرة.. متهيألى دى عليها عسكري واحد.. معلهاش حد!

سليمان: لا فيه حراسة بوليس دلوقتى.

عبد الناصر: كام عسكري يعنى؟

سليمان: فيه وحدات من البوليس دلوقتى.

جمعة: ٣٦٠ عسكري اللى فى شرطة الكهرباء اللى قاعدين فى حراسات.

عبد الناصر: يعنى هو أنا رأى فيه فرق كبير بين الحراسة وبين الموقع الدفاعى، الحراسات دول كلهم هينضربوا فى أول دقيقة وهيموتوا.. اللى هو العسكري اللى واقف حراسة وبيلف وحاطط بندقية على كتفه؛ دول كلهم فى أول دقيقة هيموتوا جميعا لأن كل واحد فيهم هدف سهل، واللى جاى لابس أسود طبعا وداخل فى الضلعة وموقف الطيارة على بعد ٥ كيلومتر.. يعنى هو فى نجع حمادى وقفوها على بعد ٥ كيلومتر. فكل الحراسة المتحركة أنا فى رأى إنها

## سرى للغاية

زى قلتها ويجب إن احنا نلغيها كلية، ويجب الحراسة تكون فى مواقع محصنة وناس قاعدين صاحيين بالبندقية والرشاش، أما الشخص اللى واقف ده فى أى مصنع لا يساوى شئ!

صدقى: بنحصر يافندم كله ونأهل.

عبد الناصر: بالذات طبعا اللى هيبجى يضرب هيضرب منطقة حلوان، هيضرب مصنع السكر اللى فى قوص مثلا.. مش فيه فى قوص مصنع سكر؟

صدقى: أيوه فيه مصنع.

عبد الناصر: سهل أوى ضرب مصنع السكر اللى فى قوص، هيضرب فى الحوامدية أو فى الصعيد فى مصانع السكر.

كامل: نجع حمادى كلها.

مرعى: ضربهم بسهولة جدا.

عبد الناصر: كل دى أهداف.

جمعة: فيه فكرة سيادتكم، بناء على التوجيهات دى ممكن نحول الجيش الشعبى لحماية المصانع أساسا، ويناخذ الأهداف الحيوية الأخرى اللى هى الكبارى والقناطر للقوات المسلحة والشرطة. وده اللى بيوفر على ممدود الأكل واللبس؛ لأنهم عايزين ياكلوا عايزين يناموا مجيش أقوله تعالى وصوموا! جوه المصنع أهو عايش الوردية ووسائل المعيشة موجودة. يبقى الجيش الشعبى كله دفاع عن المصانع والشرطة والجيش دفاع عن الأهداف اللى بره.

فوزى: كويس.

## سرى للغاية

البشرى: هو ناقص بس اختيار الناس اللى هتقوم بالدفاع الشعبى عن المصانع، برضه بيتهيألى إن الأجهزة السياسية لازم تشترك مع سيادة الفريق.

عاشور: ماشيين إحنا كده يافندم، بنبعث عنه كشف فى الاتحاد الاشتراكى وفى المباحث العامة وبعدين بيحى الرد.

صدقى: هو الحقيقة داخل المصانع سهل، أوى لأن ممكن تنظيمها سهل لأن الإدارة موجودة وتقدر تنظم العملية.

عبد الناصر: يعنى دلوقتى المصانع الحربية إنت مسؤول عنها؟

البشرى: أيوه يافندم.

عبد الناصر: كل المصانع فى البلد إنت مسؤول عنها كل محطات الكهرباء إنت مسؤول عنها، يبقى فاضل ايه؟

كامل: محطات الصرف يافندم، ده خط واحد يافندم ممتد من شرق الدلتا لغربها يعنى ممكن جدا..

عبد الناصر: محطات الصرف.. مين المسؤول؟

فوزى: ما دخلناها دلوقتى.

عبد الناصر: يبقى محطات الصرف هياخذها شعراوى.

كامل: بيؤثر يافندم على ما لا يقل عن واحد ونصف مليون فدان على إنتاجيتهم فوراً المحطات.

عبد الناصر: القناطر، البرازخ يعنى إنتو واخدينها.



## سرى للغاية

فوزى: أيوه يافندم.

عبد الناصر: اللى هو من القناطر الخيرية أرض وجو.

مصطفى: محطات المياه.

عبد الناصر: نعم؟

مصطفى: مياه الشرب، محطات مياه الشرب.

عبد الناصر: محطات مياه الشرب الحقيقة هو مش هيقدر ينزل جنبها.

صوت: العباسة شمال الدلتا.

عبد الناصر: فيه حاجة مش داخلة فى الجيش؟

مصطفى: العباسة.

فوزى: فيه نقط مياه كتير بقى يافندم.

عبد الناصر: البلاد كلها يعنى؟

فوزى: آه.. كل التوعية اللى احنا عملناها، نزلنا منشور بطريقة مش تدمير لا تلويث وخطينا التوعية على هذا الأساس الشرب خصوصا.

عبد الناصر: لا.. طب حراسة، أنا قلت لكم: إن فيه ناس راحوا هنا ودخلوا محطات المياه ورموا فيها ورق، هل اتعمل حاجة بهذا الموضوع؟ يعنى نمسك هنا القاهرة والإسكندرية.

## سرى للغاية

عاشور: الجيش يافندم واخذ عندى هنا فى بيان ٦٨ هدف مياه بس، يعنى واخذ فى القاهرة ٥ وفى الإسكندرية ٥، وعطينا من ضمن مسؤوليات الدفاع برضه بعض أهداف فى القاهرة والإسكندرية ومتروك الباقي للحلول الذاتية. فى المحافظات عامل مياه لأن عندنا كهربا ومياه وبتترول ونقل ومواصلات وصناعة.. دى الأهداف الأساسية فالدكتور حسن كان ببسأل عشان المياه بالذات، فنقدر نديله الأهداف اللي مش واخدها الجيش اللي تبقى مسؤولية الشركات أو ناس مسؤولين عن المياه.

جمعة: شركات المقاولات، الصعايدة الموجودين يخشوا للدفاع عن محطات المياه..

مصطفى: نغطى حراسة هنا أو نعمل دورية وورديات..

عبد الناصر: هو أنا كنت اتكلمت مع أمين على أساس إن اليهود كانوا بيشتغلوا فى ميناء البصل وفى المنطقة اللي هناك بتاعة القطن وعشان المنطقة دى بالتفصيل، وإذا جم وعملوا عمليات تخريب فى المناطق اللي هناك بالنسبة لكبس القطن والعمليات دى بيلخبطلوا لنا عملية القطن كلها؛ معرفش بحثت إنت ولأ إيه الموضوع؟

هويدى: أبوه.. هو كان لى يافندم والله إقتراح بس استرسالا لكلام الأخ شعراوى. دلوقتى اللي أنا متخيله إن الأخ فوزى هياخذ ٣٠٠٠٠ عسكري من عنده يديهم للأخ شعراوى بتسليحهم.. الى آخره. أنا كنت بقول توحيداً للمسؤولية وتوحيداً للقيادة الأخ فوزى ينشئ قيادة جديدة إسمها قيادة دفاع عن منطقة خطوط المواصلات.. هذه القيادة قيادة فعليه لها غرفة عملياتها قائمة بتدريب وحداتها تسليحها.. الى آخره، وتوضع تحت قيادتها كل القوات اللي ممكن مثلاً توفرها الشرطة.. الى آخره؛ لأن اللي شايف المنظر دلوقتى إن فيه مناطق الحكم المحلى ماسكها مناطق مسؤولية الجيش مناطق مسؤولية الشرطة!

عملية الدفاع لها وسائل إنذار وسائل الإنذار هذه فى إيد القوات المسلحة، القوات المسلحة أيضاً فعلاً حالياً قائمة بإعطاء أطقم تدريب وقائمة بإعطاء الأسلحة.. الى آخره. فأنا بقول: توحيداً للعملية تنشأ قيادة جديدة بضابط كفاء جدا وله هيئة أركان حرب فعلاً وله غرفة عمليات، وهو اللي هيتولى الدفاع عن منطقة خطوط المواصلات بالكامل، وتوضع تحت قيادته كافة القوات المتيسرة، إذا كان هيبقى فاضل قوات عند الأخ فوزى ومسميها كتايب حراسة أو ٣٠٠٠٠ عسكري اللي هيديهم إضافيين للأخ شعراوى أو أى

## سرى للغاية

قوات متوفرة - زى ماسيادتك دلوقت ما وجهت - إن احنا نكثر كتاييب الحراسة؛ كل هذه القوات تصبح تحت قيادة هذه القيادة وهى التى تتولى هذه العملية.  
أما الجيش الشعبى فهيكون من العمال نفسهم بتوع المصانع وقائمين بالحراسة داخل المصانع بتاعتهم، بس نتخيل إن توحيد القيادة هنا وتوحيد المسؤولية من أهم ما يمكن؛ لأن برضه لو الواحد استرسل فى التخيل إن القوات المسلحة مش ممكن أقول: إن هى بس القوات الموجوده فى القناة.. هى القوات الموجودة فى القناة ومنطقة خطوط مواصلاتها بالكامل؛ لأن لو إدمرت خطوط المواصلات فعلا هتؤثر على القوات فى المواقع الأمامية ولذلك لازم تكون المسؤولية مسؤولية موحدة.. ده مجرد اقتراح.

عبد الناصر: ما إحنا بنعتبر فعلا فوزى هو المسؤول الأول عن العملية كلها، هو المفروض هو مكانش لما اتكلما يعنى هو فاجئنى يوم وقال لى: إنى وجدت إن أنا هضطر آخد من الـ ٢٤٢ هدف وخذ هو المسؤولية لأنه شاف العملية اتمطوحت، ولكن قطعاً مفيش عندك مانع إن يبقى عندك قسم.

فوزى: لا.. طبعاً مفيش مانع، بس معتمد فى هذه الحالة علشان ماطولش خط المواصلات باعتمد على المناطق العسكرية، هى نفس الفكرة بس عشان يبقى فيه قيادات محلية ورابط القيادات المحلية بقيادة واحدة.

هويدى: يعنى هى يافندم هتبقى مثلا منطقة محطات الصرف هتبقى منطقة لأنها كلها تقريبا على الساحل الشمالى.

فوزى: ما هى موجودة.

هويدى: وهتبقى منطقة تابعة للقيادة المركزية بتاع القيادة بتاع الدفاع عن منطقة خطوط المواصلات؛ لأن العملية أنا متخيل إنها عملية جدية جدا والعدو قد يقوم بأى شئ - زى ماسيادتك دلوقتى تفضلت - وهو فى حالة عصبية جدا من وضعه الحالى وبيأخذ أى إجراء.

## سرى للغاية

عمليات بتاعة بيروت قد تخسره سياسيا ولكن هو عملها، وعملها تحت وطأة الأعمال والموقف الغامض سياسيا بالنسبة له أو عسكريا. فبقول: لو خدنا هذه المنطقة كلها كمنطقة وتبقى موجودة تحت قيادة، هذه القيادة بتدى تعليمات وأوامر عمليات وتجارب وتفتش وكل حاجة؛ لأن برضه لو جينا خدنا وكيل وزارة برضه هيتفتش هذا وكيل الوزارة غير متمرس.

عبد الناصر: هيفتش على الغدا يعنى دى وكالة وزارة الزراعة! (ضحك)

هو يدى: فمعرفش..

عبد الناصر: هو دلوقتى اللي أنا برضه أنا فاهم كلام فوزى إن فيه مناطق..

فوزى: أى منطقة لازم فيه إشراف عسكري، فيه عندى منطقتين فيه منقباد وفيه أسوان ففيه إشراف فيه قيادة منقباد وفيه قيادة موجودة فى أسوان.

عبد الناصر: هو طبعا بس الأركان حرب فى القيادات، دى مش درجة أولى يعنى؟

فوزى: مع سيادتك يافندم.

عبد الناصر: وإسكندرية أيضا.

فوزى: وإسكندرية أيضا.

عبد الناصر: يعنى مايقدروش يقوموا بالواجب.

فوزى: لا.

عبد الناصر: يعنى إذا كنت هتخليهم يقوموا بالواجب اللي هي المناطق، يبقى لازم تعين staff.

## سرى للغاية

فوزى: لا.. عينته فعلا مسكت الضباط وضميتهم على هيئة عمليات القوات المسلحة؛ لأن الموضوع موضوع دفاع، عشان شبكة المواصلات دفاع بس كنت مديهم واجب المتابعة مش واجب القيادة؛ لأن القيادة سايبها محليا لقائد المنطقة و رابط قواد المناطق عن طريق هيئة العمليات برضه. يبقى ده يمكن أسلوب أفضل شوية، وإذا كان كده يعنى بلاش الـ ٣,٠٠٠ جندى لأنى أنا فى الإنشاء بطى شوية ومقدرش أخرج وحدة سلق زى ما كنا بنعمل زمان؛ فبلاش الـ ٣,٠٠٠ جندى، وأقدر أكون بيهم حاجة عاجلة وأقدر أعطى بيهم الشئ الملزم بالنسبة لـ ١٠٠ هدف بتوع الأخ حمدى.

عبد الناصر: أيوه يبقى أحسن وتبقى تاخذ إنت الـ ٢٤٢.

فوزى: طيب.

عبد الناصر: وتزود كتايب الدفاع بدل ٥ تعمل ١٠ مثلا.

فوزى: هتصرف أنا فيهم هنزودهم سواء الزيادة فى دى أو الزيادة فى كتائب الصاعقة؛ ده قرار خدناه وماشيين فيه، ونجعل الحاجة الثانية internal security داخل المنشأة أو داخل المصنع وماليش دخل بيهم.

عبد الناصر: آه.. يعنى دلوقتى المصانع هنديها مسؤوليتها ومحطات الكهرباء أيضا هنديها المسؤولية اللى فى المحافظات.

فوزى: ما عدا الحاجات اللى محتاجة لدفاع قوى ومباشر.

عبد الناصر: آه.. قل لنا ياصدقى.

فوزى: لأنى أنا مقتنع بيها لأنها تساوى الشئ الفلانى.

عبد الناصر: لأن هى واحدة أسبقية تانية متهيألى.

## سرى للغاية

فوزى: يعنى مش هرجع فى شئ نفذناه وإحنا نفذنا ٥٠٠ كيلو وات فعلا.

عبد الناصر: لا.. مثلا محطة جنوب القاهرة دي اللي مثلا بسأل عليها، عليها عسكري ما عليهاش حاجة!

فوزى: بنعتبرها داخلة.

سليمان: هو يعنى فيه عدة أنواع من الأهداف فى الواقع.. فيه أهداف ممكن بيتوفر فيها عمال يمكن لهؤلاء العمال أن يقوموا بأعمال الحراسة والدفاع، لو أمكن تطعيمهم بقوات أيضا من قوات الجيش فى الأهداف الدرجة الأولى. فيه أهداف تانية مافيهاش قوات ومافيهاش عمال العدد الكافى بحيث أنه يمكن يعنى تجنيدهم لهذا الهدف.

فوزى: موجودين يافندم ضمن الـ ١٠٠ هدف.

عبد الناصر: اللي هم جنوب القاهرة.

فوزى: محطة شمال القاهرة ومحطة جنوب القاهرة، محول حلمية الزيتون، محطة مدينة نصر.

عبد الناصر: والمحطة الجديدة بتاعة ويستتجهاوس مسمينها إيه؟

سليمان: غرب القاهرة.

عبد الناصر: غرب القاهرة موجودة؟

سليمان: كل دول متغطين مع..

عبد الناصر: شمال القاهرة.

فوزى: شمال القاهرة، جنوب القاهرة، محول حلمية الزيتون..

## سرى للغاية

عبد الناصر: غرب القاهرة موجودة؟

فوزى: غرب القاهرة.

سليمان: ضرورى دى أكبر هدف.

عاشور: إيه .. مش موجودة يافندم.

بدوى: تبع القلوبية يمكن؟!!

عبد الناصر: دى هى أجدد محطة ٤٣ مليون دولار عملة صعبة.

سليمان: لا.. لا.. موجودة موجودة.

فوزى: محطة إرسال اللاسلكى، القلوبية محطة مدخول الإذاعة الخارجية، غرب القاهرة اللي على طريق مصر إسكندرية موجودة، ٢ واحدة خاصة بالسد العالى وواحدة خاصة بالمحولات داخلية من ضمن الـ ١٠٠ هدف اللي كانوا هيتخصصوا للحكم المحلى.

عبد الناصر: طيب.. هتاخذ إنت دلوقتى الـ ٢٤٢ هدف.

فوزى: أيوه يافندم.

عبد الناصر: طيب النقطة الثانية: هل شعراوى يقدر ياخذ، أنا بعرف إن فيه ناس كتير من اللي سابوا الجيش يحبوا يدخلوا البوليس، مش كده؟

جمعة: صعب دلوقتى، هو أنا عندى حوالى ٥,٠٠٠ عسكرى مش عارف أجيبهم.

## سرى للغاية

عبد الناصر: ٥,٠٠٠ إيه؟

جمعة: ٥,٠٠٠ عسكرى نقص فى ميزانيتى عساكر الدرجة الأولى مش عارف أحببهم.

عبد الناصر: كده؟! كده؟!

جمعة: آه.

عبد الناصر: ماهيتهم كام دول؟

جمعة: هو العسكرى ماهيته ١٠ جنيه، هو بيفضل يروح أى مصنع أو أى حاجة فى وسط بلده قاعد ومفیش مسؤوليات زى مسؤولية الشرطة.

عبد الناصر: فيه مراتب بـ ١٠ جنيه ومحدث راضى يروح يشتغل؟!!

فوزى: من وجهة نظرى يافندم، لو فيه حاجة زيادة بتدخل فى مقام الـ ١٠٠ هدف اللي هاخداهم تساويهم معنديش مانع أزود، لكن أنا من الأصل كنت مش مقتنع بأهميتها فيما عدا المصانع داخليتهم بالنظام اللي سيادتلك قلته.

عبد الناصر: أيوه يا بشرى.

البشرى: وإحنا متفقين إن دخليات النظام الفعلى تبقى مسؤولية وزارات وإحنا ماشيين على كده، بس أنا كنت بتكلم على حاجة مع الأخ فوزى.. فيه بعض التكديسات من ذخيرة ومفرقات كميات كبيرة أوى فى بعض الحنت؛ يعنى عندنا مثلا فى حنة ١٠٠٠ طن TNT أو ١٠٠٠ طن ديناميت. من الممكن طبيعى حد يركز عليها ويأخذها ويخرج برا يقدر يعمل تخريب واسع النطاق فى البلد.

إحنا اتفقنا مع الأخ فوزى إنه يزودلنا الحراسة، إنما كل رجائى إن القوة العسكرية الموجودة تبقى برضه تحت إشراف وسيطرة أجهزة قوات الدفاع والقوات المسلحة؛ لأن برضه الجهاز بتاعنا جهاز مدنى.. بس النقطة دى لو الأخ فوزى..



## سرى للغاية

فوزى: مفيش مانع يافندم، هو تكديس الموجود خطر فعلا عند الكيلو ٥١ طريق الفيوم.  
وبعدين أنا حبيب أرفع المرتب عشان ياخذ مسؤولية، من الأصل فيه جهاز أمن  
فى المصانع من زمان فإذا كان ناخدها مفيش مانع .

عبد الناصر: وأنا رأى الجهاز الأمنى تاخوده إنتو إذا كان فيه كتيبة تبقى تبعكم، تبقى تبعهم هتبقى  
بايظة.. على طول هتبولظ يعنى!

البشرى: إداريا..

عبد الناصر: لا.. إداريا وتدريبيا وجزائيا.. الى آخره ماتبقاش تايهة يعنى.

فوزى: بصراحة كده أنا معنديش..

عبد الناصر: بالكتيبة دى!

فوزى: وبعدين زمان خدت سكة - بعد إذن سيادة الوزير يعنى - منحرفة، كل واحد عايز يتجند!

عبد الناصر: ويروح على هناك!

البشرى: هو النظام دلوقتى إتعدل هو دلوقتى تابع للمخابرات الحربية. وكان فيه حاجة تانية برضه  
فيما يختص بالعمال اللي بيشتغلوا فى الإنتاج الحرى لما كانوا - وده سبب من أسباب  
٥٤ - لما كان بيتجند بيقتد ٣ أشهر فى الجيش وكان بيجند على إسم سرية الصناع  
العسكرية؛ هى دى اللى اعترض عليها الأخ فوزى ولغاها واتفقنا إن احنا نلغيها. إنما فيما  
يخص بقوة الحراسة، لازم تكون أقوى تحت سيطرة القوات المسلحة وبدون شك التدريب  
بتاعها هيكون أقوى.

عبد الناصر: ها ياحمدى؟

## سرى للغاية

عاشور: هو يافندم عشان الكلام بيقى واضح اللي فهمته إن الـ ٢٤٢ هدف هيبقوا مسؤولية القوات المسلحة، وبعدين هقعد أنا أفحص الـ ١,٢٤٦ مع السيد شعراوى لعله ياخذ جزء كمان من ده.. أقوى من المصانع يعنى هنسيب المصانع

عبد الناصر: المصانع مسؤولية عزيز، محطات كهرباء مسؤولية صدقى، اللي فى المحافظات واللى فى كل حطة، المصانع الحربية مسؤولية البشرى، محطات المياه مسؤوليتكم.. الأخ وزير النقل بيقول لى إدينى بعد أسبوع تقرير يقول لى إيه الكبارى بتاعته اللي هى ماعليهاش حراسة.. يعنى أنا طلبت منه البيان بالكبارى.. إنت بعت لى بيان بالكبارى.  
طيب برضه يعنى مي جيش كل واحد يرمى على المحافظات، عايزين نعرف إيه الحطة اللي ناقصة.. لو واحد شاف حطة ناقصة بيقولنا الحطة الفلانية ناقصة، وبعدين العملية بتاعة أبيض اللي هى فيها الإذاعة؟

فائق: داخلة.

عبد الناصر: داخلة والمنصورة؟

فائق: داخلة.

عاشور: السؤال التانى بقى يافندم.. موقف الـ ٧,٠٠٠ بندقية اللي باسم منظمات الدفاع الشعبى، برضه هنتفق مع شعراوى لعله هياخذ جزء من الأكثر من ٢٤٢ والسلاح بتاعهم هيبقى معاهم.. يعنى هو عايز سلاح، يعنى هنتسق إحنا الثلاثة.

عبد الناصر: آه.. يعنى هو السلاح موجود، يعنى اللي أنا فاهمه إن القوات المسلحة فيها سلاح.

عاشور: ما هم مش هيدونا إلا الـ ٧,٠٠٠ بس.

عبد الناصر: بس أما هتخطوا على الـ ٧,٠٠٠، يعنى هو قال الراجل إنكم بعد الـ ٧,٠٠٠ مستعد يدى.

## سرى للغاية

عاشور: بس أنا كنت أخشى يافندم بعد ما الفوج الأول ما يدرب والتانى مانلاقيش سلاح! أول مرة مكانش فيه.

عبد الناصر: لا.. لا.. هل فيه عقبة فى السلاح؟

فوزى: لا يافندم .. مفيش، بس كلمة صغيرة يافندم لو سيادتك توافق برضه أنا بقول إن أكثر من الـ ٢٤٢ دول أهداف دفاع نخلى الباقي حراسة مشددة؛ ومن هنا يختلف الوضع التنظيمى فى اللى يتوجد على كل منشأة.

عبد الناصر: هو الواحد برضه بده يعرف إيه الباقي؟! ما إنتو لازم برضه تاخدوا نظرة على الباقي.

فوزى: والله قعدنا فيها مدة طويلة.

عبد الناصر: لا.. إيه الباقي يا حمدى؟ إدينا أمثلة عندك.

عاشور: أيوه يافندم كله.

عبد الناصر: إدينا أمثلة عندك، ناخذ أمثلة من الباقي.

عاشور: يعنى مثلا أمسك القاهرة ولو حبيت أمسك مثلا إسكندرية، نمسكها أقسام، فقال إن الأهداف الحيوية بتاعه محطة اللاسلكى، محطة طلمبات الطابية، كوبرى طلمبات الطابية، وابور النور، نفقات الطلمبات، محطة سكة حديد أبو قير، محطة سكة المعمورة، محطة المنتزة، محطة العصافرة، وابور مياه المعمورة، خزان مياه المعمورة، كوبرى عوايد المعمورة، نفق الطلمبات، محطة سكة حديد المنذرة، كلها محطات سكة حديد.

صوت: مش دى.

## سرى للغاية

عبد الناصر: هو محطة المعمورة والمنتزة والكلام ده هو العملية اللي هو خط رشيد ينضرب يضرب النفق بتاع المنتزة، يطلع فى العملية دى كلها لو عملوا حاجة فى السكة الحديد يتصلح فى نص ساعة ماعدا نفق المنتزة، وبعدين نفق المنتزة هينزلوا فين؟

عاشور: فى أبو قير يافندم، على إعتبار إن دى أقرب حثة إنزال وكنت خايفين منها فعلا، أنا كنت خايف على السد خالص وقلت لسيادة الفريق.

فوزى: السد دخل.

عاشور: وسيادتك عارف آه.. ما أنا عارف، لا.. هو سيادة الرئيس بيسأل عن منطقة النزول.

عبد الناصر: ما هو إحنا لازم نحسب، يعنى ما إحنا منحسبش على الغارات الجوية بنحسب على كوماندوز.. تنزل هليوكبتر ويشتغلوا كوماندوز؛ يعنى منجيش نبص لكل هدف لازم هينزل فين وهيمشى قد إيه.. يعنى هو بيمشى ٥ كيلومتر مثلا فى الصحراء، فى الأرض الزراعية هيعمل إيه حتى لو إذا كان معاه عربية؟ يعنى هى العملية بنحسب هينزل فين فهيبقى على طول هدف حيوى.

عاشور: على العموم يافندم أنا استفدت من الجلسة، فى إجتماع المحافظين يوم الخميس هنفهم إننا لازم نضغط الأغراض دى كلها؛ باعتبار إن الـ ٢٤٢ كلها راحوا للجيش هناخد أقل عدد ممكن.

كان فيه نقطة يافندم أثيرت ودى برضه موضع مناقشة، حماية خط أنابيب البترول من السويس الى القاهرة.

صدقى: فين؟

عاشور: حماية خط أنابيب البترول من السويس الى القاهرة، دى مشكلة خطيرة من الواجب رعايتها.

## سرى للغاية

صدقى: خط الوسط أهم حاجة.

مصطفى: لا.. خط الوسط ٩ عجرود.

فوزى: خط الـ lincks واتغطت.

عبد الناصر: لا.. محطة الظلمبات أنا كنت سألت عليها إمبارح برضه.

فوزى: عجرود؟

عبد الناصر: لا غير عجرود فيه محطة بيقولوا..

صدقى: الوسط.

عبد الناصر: الوسط آه.

فوزى: الكيلو ٣٣.

عبد الناصر: إتغطت؟

فوزى: أيوه يافندم.

عبد الناصر: مطار غرب القاهرة! (ضحك) يمكن ينزلوا فيه ويعملوا زى ما عملوا فى بيروت! (ضحك)

أصوات: (ضحك)

عبد الناصر: أصل أنا برضه الكلام اللى على كتايب حراسة المطارات عايزة إعادة يعنى، إتأكد إنت منها إن الكتايب يعنى أهى دى بقى عملية سهلة.

## سرى للغاية

فوزى: لا.. يافندم فيه اطمئنان عليها.

عبد الناصر: هل الـ ٣٩ مطار اللي عندنا كله صالح لشغل الطيران الحربي؟

فوزى: أيوه يافندم، بس فيه محتل وفيه مش محتل.

عبد الناصر: هل اللي مش محتل ممكن يحتل وعايز..

فوزى: لا.. يافندم عايز أطقم بالكامل.

عبد الناصر: نعم؟

فوزى: عايز أطقم بالكامل، فنية وأرضية ودفاع جوى واحتلال زى كوم أوشيم. مثلا النهارده، حطوا احتياطي لزيادة القوات اللي هيبجوا، سيادتك عارف ١٠ أصناف وخذت مرحلة الإنشاء سبقت وكل ما بيجي سرب بندخله.

عبد الناصر: إنما هم عندهم مساحة صغيرة دي عندهم ٥٠ مطار، وإحنا كان عندنا ٩! يعني في ٥ يونيه اللي كان بيشتغل منهم ٩. طبعا ٩ كان بيخلصوا عليهم بسرعة، النهارده عندنا ٣٩ الحقيقة يجب إن احنا نكمل ٣٩ بالدفاع الجوى.

فوزى: إن شاء الله هي ماشية الخطة.

عبد الناصر: يعني هو برضه أنا بقول دفاع جوى نشترى ولو بعمله صعبة، نشترى نص بوصة برضه يعني العملية هطول.

فوزى: ماشية كويس يافندم.

جمعة: لو أدنت لى يافندم، بالنسبة لرئاسة المحافظين اللي هم أنا عندي ٨٠٠٠ عسكري.

## سرى للغاية

عبد الناصر: دلوقتى!؟

جمعة: آه ٨٠٠٠ عسكرى درجة ثانية فى جميع الجمهورية، وبعدين حسب التقدير السريع لأهداف السادة المحافظين عايزين ٥٠٠٠ عسكرى ده غير الـ ٢٤٠ هدف.

عبد الناصر: عايزين تانى ٥٠٠٠!

جمعة: آه.. فدى عايزه دراسة الحقيقية بحيث - زى ما شرحت لسيادتك دلوقتى - بالنسبة لأهداف إسكندرية كلها ويمكن النفق هو الوحيد هو المهم دلوقتى.

عبد الناصر: آه.. محطة المعمورة ولا محطة أخرى ما يهمش أبدا، لأن هو الحقيقة مطلوب إعادة نظر فى هذا الكلام.

عاشور: يوم الخميس يافندم إن شاء الله.

جمعة: وبعدين بالنسبة للمصانع، هو أنا شايف الفريق فوزى مختلف مع سيادتك شوية فى وجهة النظر، يعنى سيادتك عايز تعتبر المصنع فيه دوشم ودفاع هو الفريق فوزى بيعتبرها أمن داخلى، والفرق واضح بين الاتنين الحقيقة.

فوزى: لا.. لا.. بس أنا قلت نقطة انذار فى الخارج بتدور خارج السور بتاع المصنع مش داخله.

جمعة: إذا كنا هنعتر إننا هتحتاج الى خطة دفاع، يبقى القوات المسلحة عليها إنها تمد السادة الوزراء بالخبرة؛ يعنى تبعت واحد يشرح لهم إيه هى خطة الدفاع وهتعمل إزاي ومواقع الدوشم.

عبد الناصر: كل مصنع هيلاقى فيه عشرة ضباط على الأقل يعنى، الجمعيات التعاونية هيلاقى فيها لواء! (ضحك)

## سرى للغااية

أصوات: (ضحك)

فوزى: هو المفيد يافندم إنهم يسمحوا لنا بلجنة متابعة، تروح وتختبر حاجتين.. الأوضاع ودرجة الاستعداد.

جمعة: بالضبط كده يافندم.

صدقى: ويبقى فيه تفتيش أيضا متفق على النقط اللي احنا هنعملها.

فوزى: يبقى فيه متابعة لأغراض المساعدة.

عبد الناصر: يبقى إمتى يخلص الكلام ده؟

صدقى: يعنى بيان الترتيبات اللي اتعملت؟

عبد الناصر: لا.. إمتى تتكون فى كل مصنع قوة نسميها فصيلة دفاع.. كتيبة دفاع، إمتى تتكون فى كل مصنع؟

فوزى: التكوين سهل، فى خلال أسبوع بنقدر نشوف مع المصانع تتكون إيه، بس التدريب اللازم بالاشتراك - زى ما قال الأخ شعراوى - لازم يرشدونا لوسائل التدريب وغيره، وبعدين إذا كان فيه بعض الإنشاءات تتطلب إنشاء دوشم أو غيره دى مابتأخذش وقت يعنى سهل، بس بعد ما تتكون الفرق وإمدادها بالسلاح والتدريب اللازم.

عبد الناصر: طيب دلوقتى القاهرة مش فيها مراكز تدريب ياحمدى وإسكندرية؟

عاشور: أيوه يافندم.

عبد الناصر: طيب.



## سرى للغاية

عاشور: بس أنا حبيت سيادتك أقرأ بيان المراكز كلها فى المحافظات كلها.

عبد الناصر: آه.

عاشور: المعسكرات يافندم بدأ مجموعها ٤٣ معسكر فى جميع المحافظات، تم تزويدها جميعا بمساعدات التدريب شواخص ولوحات وتخت وبيادات، ووضعت خطة للتدريب فى كل محافظة؛ بحيث تشمل موعد بدء دورة التدريب تتراوح بين ١٤ يوم و ٢٠ يوم متقسمين حسب الضباط بتوع التدريب، ما عملوها ١٠ ساعات تدريب قتال و ١٥ ساعة على أعمال الدفاع المدنى، و ١٥ ساعة توجيهات أساسية وتدريب معنوى.. ده هيتنفذ الى المصانع ودى الخطة للتدريب تحت إشراف المحافظات.

عبد الناصر: يعنى فيه مراكز تدريب موجودة هنا فى القاهرة وإسكندرية وفى كل حته، بيدوا الناس اللي عايزين يتدربوا بالاتفاق مع حمدى بيتم التدريب.

جمعة: لو سمحت لى سيادتك، هو فيه ناس متدربين جاهزين.

عبد الناصر: فى المصانع؟

جمعة: آه.. يعنى لو السادة الوزراء بيلجأوا الى الاتحاد الاشتراكى والمحافظ هيديهم ناس جاهزين للتدريب، ممكن يستعينوا بيهم مباشرة على طول.

عبد الناصر: آه.

صدقى: بعد إذن سيادتك دى عايزه خطة محددة، هنحصر كل مصنع المطلوب إيجاده كنقطة حراسة ودفاع. عددهم واللى متوفر منهم من المدربين بنكتبه بيقى بيتحدد عدد الغير مدربين، على طول بنقدر ننسق مع الأخ حمدى إمكانيات تدريبهم فى مراكز التدريب، وبعدين بالنسبة للتسليح بنلجأ للقوات المسلحة عشان برضه نحدد إمكانيات الأسلحة اللي هيديها لهم، وبقى العملية بهذا كاملة.

## سرى للغاية

عبد الناصر: تتفاهموا مع شعراوى، تخلوا الـ linck شعراوى وشعراوى يطلب سلاح من فوزى.

صدقى: وهو كذلك، حاضر.

عبد الناصر: وعلى هذا العملية تمشى، الحقيقة اللى أنا بدى أقوله إن احنا منبتديش من الصفر، فيه ناس عندنا مدرين وفيه ناس أيضا مضوا فترة فى الحرس الوطنى، وفيه ناس مضوا فترة فى الجيش، وفيه ناس اتدربوا الأيام اللى فانتت دى.. فدل نقدر نبتدى بيهم بكره. يعنى هو مش ضرورى نبتدى مثلا بـ ١٠٠ فى المصنع، إنشالله نبتدى بعشرة ثم بيبقوا ١٥، ٢٠ والعملية مع مضى الزمن هتكبر.

لكن برضه أنا بيهمنى إن اسرائيل توصل لها معلومات، لأنه هو قطعاً بيوصل لها معلومات إن فيه دفاع فى كل حته وفى كل مصنع؛ لأن ده طبعا بيترك عملية المعلومات اللى عندهم، وبيخليهم يدوروا على معلومات جديدة عشان يعملوا عملية جديدة.

صدقى: هل سيادتك تأذن إن احنا برضه يعنى أروح فى منطقة حلوان وأعمل اجتماع وينقال هذا فى الجرايد؟

عبد الناصر: آه.. يعنى بيتقال على الجيش الشعبى كلام يعنى بالنسبة للمصانع.

البشرى: بعد الاستعداد ما يستتب يبقى نعمل إعلان فى الجرايد.

عبد الناصر: هم دلوقتى طبعا following للجيش الشعبى، يعنى طبعا عارفين إن احنا بنعمل، هو الغرض من العملية لخبطة الحقيقة أيضا كل المعلومات بالنسبة ليهم. واللى أنا بقوله: إن احنا نبتدى من بكره يعنى نسيب شغلنا ونمسك عملية الدفاع دى لغاية مانخلصها، مروا على المصانع والمرافق والحتت دى كلها.

كامل: لو أذنت لى يافندم يعنى إحنا اتكلمنا على مستوى المصنع واتفكلمنا على مستوى المحافظة وعلى مستوى الجمهورية، لكن فيه بعض المناطق تحتاج طبيعتها الى الكلام على مجموعة من المصانع متجاوزة مع بعضها؛ بحيث إنها تعتبر وحدة دفاعية كبيرة الى جانب دفاع كل مصنع عن نفسه، ويمكن ده لو طبق مثلا فى موضوع زى حلوان بالذات يمكن هتكون محل فائدة.

## سرى للغاية

عبد الناصر: حلوان ومنطقة المصانع اللى على ترعة الإسماعيلية برضه.

كامل: أيوه.. متشكر.

عاشور: فى إسكندرية يافندم عملنا كده برضه فى منطقة السيوف، جمعنا مصانع السيوف كلها فى حته واحدة ومنطقة المكس كلها وبيعاونوا بعض بخطة واحدة.

صدقى: هى كفر الدوار كمان عايزه خطة.

عاشور: كفر الدوار دى تبع البحيرة.

صدقى: معلىش.. أنا بقول كمنطقة عايزه برضه.

عاشور: مع التنسيق.

عبد الناصر: بس هو طبعا يعنى الواحد عايز درجة من الوعى بحيث مايضربوش الناس بالليل أو يضربوا فى بعض! هو ميزة الأول لما تبتدى بالمصنع، إنه هيضرب اللى هيدخلوا المصنع ملوش دعوة باللى ماشى فى الشارع، إنما هنعمل إن المنطقة ولسه مايبقوش متدربين هيضربوا فى بعض وهيضربوا فى الناس وممكن يحصل ذعر! هو إحنا الأول نبتدى بالمصنع ثم بعد كده ننسق بالمنطقة؛ لأن أنا عارف الناس الجداد فى العملية دى هيبصوا أول حاجة هيضربوا رصاص، طالما إنت مديه بندقية ورصاص إذا شك فى حاجة هيضرب.. فبندى الأول الحقيقة المسؤولية للمصنع.

عاشور: كوحدة.

عبد الناصر: وبرضه أنا عايز من جوه من سور المصنع من جوه، بعمل فى الأركان دشم فى الأربع أركان وأقدر إذا كانت الحيطه طويلة أعمل دشمة تانية؛ دى عمليات سهلة كلها بأكياس رمل ويبقى العملية كلها جوه المصنع، حد حب يدخل له جوه المصنع هيضربه.

## سرى للغاية

رفعت: هو إذا كان بالنسبة للمصانع كل وردية يبقى لها فصيلة، يعنى الوردية نفسها تتغير وورديات الثانية، وتقوم كل وردية عارفة مين الناس بتوعها.

عبد الناصر: إذا كان المصنع بيشتغل ٢٤ ساعة.

رفعت: إذا كان بيشتغل ٢٤ ساعة.

عبد الناصر: هو اللي بيشتغل ٢٤ ساعة الغزل يمكن بس الغزل والنسيج.

رفعت: وإذا كان بيبقى فى منطقة مصانع يبقى فيه قوة إحتياطية موجودة، دى يمكن تكون من الجيش أحسن يعنى.

عبد الناصر: لا.. ما الجيش موجود، عندنا فرقة فى دهشور وعندنا فرقة فى الهايكستب وفيه فرقة فى إسكندرية، وأظن يعنى فرق الجيش موجودة فى كل حطة ممكن تروح.

رفعت: لا.. يعنى مثلا منطقة زى حلوان فيها كذا مصنع، إذا كان فيه قوة إحتياطية فى مركز متوسط بحيث يكون لها قيادة توجه لأى منطقة معرضة لها.

صدقى: ما حلوان لابد إن يكون فيها دفاع.

فوزى: ده موضوع القاهرة بقى.

عبد الناصر: ها.

فوزى: لا.. خارج حاجة تانية.

عبد الناصر: موضوع الدفاع عن القاهرة، قطعاً عندكم خطة للدفاع عن القاهرة، الدفاع عن الإسكندرية، الدفاع عن الدلتا كلها.. مش كده؟

## سرى للغاية

فوزى: القاهرة وإسكندرية موجودين.

عبد الناصر: والقنال؟ (ضحك)

أصوات: (ضحك)

فوزى: والقنال.. أهداف بقى.

عبد الناصر: لا.. طب ما حتى إسكندرية والقاهرة والقنال، ده دفاع جوى عن الدلتا كلها ٢٤ ساعة.

فوزى: موجودة.

عبد الناصر: بالنسبة للتليفونات يعنى السنترالات؟

فوزى: موجودة يا فندم.

أبادير: أهم حاجة السنترال الرئيسى اللي فى رمسيس، وبعدين محطات اللاسلكى اللي هى موجودة فى المعادى وفى الهرم وفى أبو زعبل.. دى بلغت عنها ونازلين فى الإتفاقية.

عبد الناصر: مع الجيش؟

أبادير: أيوه.

فوزى: محطوط سنترال القاهرة الرئيسى، محطة إرسال المعادى، دار الإذاعة بشارع الشرفين داخل من ضمن الـ ١٠٠ هدف، ومبنى الإذاعة والتليفزيون، ومركز إرسال عابدين، وشركة المحولات الكهربائية.

## سرى للغاية

عبد الناصر: طيب إن شاء الله الجمعة الجاية تدونا تقرير، الوزراء بيدونا تقرير حمدي بيدونا تقرير عن كله. برضه يعنى تبقى مسؤولية المحافظات، ولو يعنى بنخليهم الحقيقة الوزراء مسؤولين حتى يبقى فيه مساعدات.

البشرى: هو موضوع صغير خاص بشركة الطيران، يعنى يمكن دقيقة واحدة، هو بعد الساعة ١١ بالليل بتتواجد جميع الطائرات فى المطار عشان الصيانة، قيمة الطائرات اللي عندنا حوالى ٢٠ مليون جنيه، إمبارح بعد استلمنا الإخطار عملنا انتشار داخل المطار. هو كانت عندنا فكرة برضه لو توفر عندنا إنذار، إن احنا نقدر نخلى بعض الطائرات عندما يكون هناك إنذار مثلا واجب أو كافي بانتشار أوسع على بعض المطارات داخل الجمهورية أو خارج الجمهورية، إذا كنا هنتعرض يعنى لعملية شديدة. معتقدش عندنا دلوقتى إنذار كافي النهارده. زى ما قال الأخ فوزى، إننا مع التعزيز اللي عامله النهارده أعتقد أصبحت يمكن أضمن إن احنا نبقى على الطائرات فى مطار القاهرة بدل ما نوديهها أسوان؛ لأنها هتكون معزولة فضلا عن إن نواحي الصيانة بتبقى صعبة ونواحي التشغيل ضعيفة.. دي النقطة الأولى فيها الخاصة بالطيران.

عبد الناصر: بس إنت هتكون مسؤول عن المطار.

البشرى: أنا مسؤول يافندم.

عبد الناصر: يعنى لو جم اليهود هتروح له، (ضحك) يعنى مش ممكن هنقول إن فوزى مسؤول عن ده وده وده.

البشرى: من بكره الصبح.

عبد الناصر: يعنى تروح المطار وتشوف الدفاع والعملية.

## سرى للغاية

البشرى: هو فيه نقطة ثانية: اللي هي الخطوط بتاعتنا بين بيروت ودمشق وعمان وموسكو، الحقيقة مفيش مجال إن احنا نبعده.. فى النهاية اللي يروح على مطار بيروت بيفوت على صيدا وصيدا دى تقريبا على حدود اسرائيل! فالنقطة برضه فكرنا استعرضنا الموقف وهنزود التأمين ضد أخطار الحرب، حسبناه لاقيناه النهارده مع شركة مصر للتأمين إنها تمد التأمين بتاعها الى تأمين ضد أخطار الحرب.

عبد الناصر: هو إنتو كنتوا بتقولوا: إن الطائرة اللي وقعت انضرت، التقرير أثبت أنها ماانضريتش أثبت إن فيه انفجار من الداخل من مخزن العفش؛ فحد كان واخد مفرقات ومسافر.. ودى إنتو اللي كنتوا بتقولوا اللي اسرائيل ضربتها وعشان كده عايزين توقفوا الخطوط. أنا رأيي إن اسرائيل لا يمكن تضرب طائرة ركاب فى الجو؛ لأن معنى هذا الحقيقة يعنى عملية دوليا بتقلب عليهم الدنيا كلها؛ لأنه هيطلع يضرب طائرة هيضربها بركاب فيها إنجليز وفيها أمريكيان وفيها كل الجنسيات!

فهو كان قبل إن الطائرة اللي وقعت مضروبة من اسرائيل على أساس إنها فيها الفدائيين وفى الوقت ده كانت قايمة وبعدين اتغيرت، وثبت إن اللي أنا فهمته من التقرير إن حصل انفجار من داخل الطائرة مش مضروبة الطائرة ولا حاجة.

البشرى: هو تقرير الطبيب الشرعى إن الضرب حصل من تحت، إنما برضه إحنا يمكن كنا مستعدين من الخطر لأن احنا خايفين على مبلغ التأمين؛ لأن لو حصل إن احنا غلبنا الرأى بتاع إن المتفجرات انفجرت فى الطائرة يبقى التأمين هايروح وده ربع مليون جنيه! إنما من غير شك المعلومات اللي جتلنا عن طريق المخابرات الحربية، مانقدرش برضه نقطع أبدا إن الانفجار حصل نتيجة انفجار فى المخزن؛ يعنى يجوز قوى فى الجنب بحيث إنها فعلا أصابت الطيار.. يعنى برضه الحقيقة الموضوع مانقدرش نقول عليه.

عبد الناصر: مع إنه الـ Middle East مأمنين فى الـ light، يعنى الـ Middle East مؤمنة ضد أخطار الحرب.. الشركات اللبنانية.

البشرى: ضد أخطار الحرب! ده إحنا مأمنين عندهم بس ضد أخطار الحرب لأن ده التأمين غالى.

## سرى للغاية

عبد الناصر: طب ما النهارده من كلام لندن، إن اللوتس هيدفع ١٥ مليون جنيه فى العملية دى.

البشرى: إحنا النهارده مشينا فى عملية التأمين ضد أخطار الحرب.

عبد الناصر: بالنسبة للموضوع ده الحقيقة أنا شايف إنه أهم موضوع، وبعدين أنا شايف أنا برضه لابد نتكلم إن احنا لازم نبتدى عمليات فى داخل سينا فى أقرب وقت ممكن وإلا مانقدرش نفضل قاعدين بهذا الشكل، وخصوصا إن احنا النهارده عندنا قوة تقريبا أكثر من اسرائيل يعنى.

فوزى: محليا أكثر بكتير.

عبد الناصر: لا.. عندنا ٣٥ هم عندهم ٣٠ لواء.. بقينا النهارده ٣٥ لواء، دبابات عندنا أكثر من اسرائيل، المدفعية عندنا أكثر بالربع من اسرائيل.

فوزى: كله كويس ماعدا الدفاع الجوى والقوات الجوية.

عبد الناصر: القوات الجوية الطيارين بيجيلنا دلوقتى كل شهر ٣٠ طيار أو ٤٠ طيار مش كده أو ٢٥؟

فوزى: تقريبا.

عبد الناصر: والطيارات عندنا أكثر من الطيارين، والطيارة الجديدة هيدوها لنا فى فبراير.

فوزى: فى مارس أو أبريل.

عبد الناصر: فأحنا من كل النواحي الحقيقة لازمة فى ناحية القوات الجوية تعبانين مش ناحية الطيارات لا من ناحية الطيارين.. عندنا نقص فى الطيارين.  
والنقطة الثانية: من ناحية طبعا الجرارات والكلام ده.  
من ناحية الحل السلمى رياض يقول لنا رأيه بالنسبة الحل السلمى.



## سرى للغاية

رياض: مفيش حل سلمى مش ممكن! الحل السلمى معناه ضغط على اسرائيل لإرغامها على إنها تترك الأرض، حتى إنها ترغم على الضغط مفيش غير الأمريكان. الأمريكان النهارده هو بعد الكلام ده كله عن ضرورة التزام السياسة الحيادية بين العرب واسرائيل والكلام اللي قاله سكرانتون وقاله نيكسون موافق عليه وده كله؛ النهارده فى نفس الوقت أمريكا تدى الخمسين طيارة الفانتوم! طبعا مابتديش الخمسين طيارة وتتحصل عليها إلا بمعرفة نيكسون وبموافقة نيكسون مستحيل تكون معمولة ضده. إذاً الهدف الأمريكى واضح وهو المحافظة على الثغرة الموجودة بينا وبين اسرائيل، إن اسرائيل تستمر فى التفوق اللي موجود علينا. فإذاً معناه إن مفيش حل فى الواقع سلمى إلا فى الحل السلمى اللي بتشوفه اسرائيل، اللي هو الحل اللي احنا بنرفضه اللي هو معناها أخذ أرض.

الشيء الحقيقة اللي أنا بتكلم فيه باستمرار حتى كنت مع الأخ محمد فايق، والشيء اللي أنا لامسه أنا، الحقيقة العالم العربى وعندنا إن الناس حتى الآن ماهيش فاهمة عمق المشكلة؛ لأن كثير جدا ناس اتكلمت معايا ناس فى مصر وناس من العرب، لغاية النهارده الناس مهياش مقدرة عمق المشكلة ومش قادرين يفهموا. البعض متصور إنها عملية بسيطة جدا فى إن احنا لو قعدنا، وفيه البعض النهارده بيتكلم.. ومالوا نحل الحل المصرى، ونتقوى وبعدين نقدر نساعد العرب بعد كده. فمتصورين إن العملية بالبساطة دى، وإن المشكلة ممكن فعلا إنها تتحل عن طريق التفاهم مع الأمريكان أو عن طريق التفاهم مع اسرائيل بشكل مباشر.

محدث مقدر إن اسرائيل فعلا عايزة أرض ومبتهزرش لما بتقول إنها عايزة أرض، وعايزة أرض عشان بعد كده تتم السيطرة الاقتصادية. أنا عملت دراسة طويلة عن نتائج إنهاء حالة الحرب.. يعنى الآثار القانونية والاقتصادية اللي بتترتب على إنهاء حالة الحرب، واللى مع الوقت هنبص نجد نفسنا هنواجه مشاكل كثيرة هتطلع لنا. يعنى أهم حاجة النهارده اسرائيل حاطة لى فيها طبعا إنهاء المقاطعة الاقتصادية على الأقل، إنهاء المقاطعة الاقتصادية فى حد ذاتها معناها إن اسرائيل هتتحول الى سويسرا؛ الخبرة الموجودة والرأس المال تكون أكبر قاعدة صناعية فى المنطقة. ففيه ناس كثير الحقيقة للأسف لغاية النهارده مش مقدرين عمق المشكلة، ولازالت العملية الحقيقة فيها بتحتاج الى؛ مش طبيعة مصر الحقيقة إنما فى العالم العربى كله حتى إن المسألة تكون أوضح من كده.

## سرى للغاية

اسرائيل بعد ٥٦، تتذكر سيادتك إنهم لما أرغموا على الانسحاب كانت الدعاية الوحيدة بتاعتهم إن احنا قومنا بالحرب وكسبنا فتح شرم الشيخ؛ ما هو لازم يحولوا الخسارة الى مكسب كل واحد بيجاول هذا. فالنهارده لو خرجناهم ونجحنا فى الضغط عليهم الى حد أنهم خرجوا وإفترضنا حتى إن قرار مجلس الأمن إنه يتنفذ، هتجاول اسرائيل إنها تقول: إنها كسبت شىء، بينما إحنا فى الواقع لازم يكون واضح لو نجحنا فى حل سلمى نتيجة ضغط، إن احنا مكسبنا هيكون ضخم جدا لأن هيكون فيه هزيمة وهزيمة شنيعة لاسرائيل. الغرض كله أنا من كلامى إن تبان ضخامة المشكلة، وإن العملية عايزة جهد مننا فعلا جهد متواصل وكبير، إنما حسب الشكل اللي ماشيين بيه طبعا أو شكل التصرف الأمريكى اللي ماشى بيه؛ مش باين إطلاقا إنه ممكن نصل الى حل سلمى وإن المعركة هتكون معركة طويلة وهتاخذ لسه مننا وقت طويل جدا.

غانم: نحب نستفسر على أسباب الهجوم على مطار بيروت؟

عبد الناصر: نعم؟

غانم: أسباب مهاجمة مطار بيروت إمبراح، هل هى عملية مجرد انتقام لعملية الطيارة البوينج ولّا لها أسباب أخرى يعنى؟

عبد الناصر: هو أنا بعتبر إن هم متضايقين جدا من عمليات الفدائيين، وإن بدهم يجبروا الحكومة اللبنانية على تصفية الفدائيين، زى ما هم عايزين يجبروا الحكومة الأردنية على تصفية الفدائيين؛ فضربوا لبنان وهم يعلموا طبعا كل شىء فى لبنان، وإن فيه معسكرات فدائيين هناك وفيه مراكز رياسة والسياسيين كلهم بيدافعوا عن العمل الفدائى؛ فالغرض من ده إن لبنان يصفى الفدائيين فمتهيألى مش ممكن هينجح هذا الغرض.

والنقطة اللي أنا متصورها يعنى برضه بقول: الراجل الأمريكانى اللي جالى وقال لى: they are desperate أنا ما بقتش مصدق! بيقول لى هو عارف اسرائيل وإنهم ممكن يعملوا أى شىء، إيه يعنى أى شىء؟ قلت له: إيه يعنى ممكن يعملوا أى شىء؟ قال لى: ممكن بيجوا القاهرة، قلت له: مش ممكن يعنى مستحيل! قال لى: ممكن يجولك فى البيت! لأنه هو متصل بيهم ويعرفهم.. they are desperate وقال لى بهذا الشكل!

## سرى للغاية

والحقيقة لازم نطلع فعلا النهارده كلام غالب لما قابل يارنج فى موسكو، بيقول: إن اليهود متنرفزين جدا من أعمال المقاومة، وبعدين هم يعلموا أيضا إن احنا اللي بندى المقاومة دي الصواريخ.. الصواريخ دي صناعة محلية مش صواريخ روسى يعنى معمولة عند البشرى، والتمويل أيضا من عندنا بالنسبة للفتح، بالنسبة للجبهة الشعبية التسليح والتمويل من عندنا.

وبعدين عارفين إن احنا إدينا تعليمات بضرب إيلات وضربت إيلات، وعملية بيسان كان ضرب بيسان كان فيها ضباط من عندنا، وعملية التدريب فيها ضباط هنا فى الأردن من عندنا؛ كل ده عارفينه فى اسرائيل، فهم الحقيقة متنرفزين جدا وعملية الأمن عندهم بقت عملية أساسية.

وبعدين عندنا معلومات أيضا من لندن برضه نقلا عن صحفيين كانوا فى اسرائيل، إن موضوع الفدائيين مسبب لهم حالة عصبية شديدة جدا.

فهو النهارده هيضرب بدون وعى فى أى حته، وبعدين هو وقف ديان وقال: إن الفدائيين دول زى البيضة فى إيدى.. كلام فى الأول وبعدين مقدرش الحقيقة.

وبعدين عملية ضرب تل أبيب وعملية ضرب القدس مرتين والعمليات دي كلها، وبعدين عملية رفض الفلسطينيين إنهم يتفقوا معاهم، مفيش غير الجعبرى بس هو اللي وافق إنه يتفق وبعدين رجع فى كلامه وبعدين خدوه ودوه تل أبيب عشان يحموه. فبيعلموا إيه؟ يعنى العملية يعنى عايزين يوصلوا الى حل سلمى بأى وسيلة، لكن يكسبوا أيضا أرض وعايزين يوصلوا لحل سلمى بشروطهم.

يعنى هو استراتيجيتهم الأساسية بتاعة بن جوريون: to force a settlement

النهارده هو نفذ جزء اللي هو كسب وانتصر، مش قادر يوصل لل settlement اللي هو عايزه. فأنا رأيت إنه هو - وأنا قلت برضه وأنا فى المجلس قبل كده - إنه هو هيضرب فى أى حته وهيعملوا حاجات يعنى، علما بأن لبنان محمية أمريكا واللبنانيين مالهومش دعوة بالحرب خالص؛ كون أنه يضرب مطار بيروت وهم عارفين إن مطار بيروت مافيهوش عسكرى واحد!

فائق: بمناسبة الحديث عن الحل السلمى، نقدر ناخذ فكرة عن زيارة جروميكو وزيارة سفير الهند فى واشنطن؟

## سرى للغاية

عبد الناصر: لا.. هو سفير الهند فى واشنطن ده أصله هو الراجل كانت علاقتى بيه قوية مفيش حاجة عنده الحقيقة، سفير الهند فى واشنطن يعنى هو الكلمة الوحيدة اللى قالها لى: إن رأى العام فى أمريكا النهارده مابقاش كله مع اسرائيل مابقتش هى الدولة الضعيفة، لكن الباقي كله يعنى هو كان هنا قعد فترة طويلة.

بالنسبة لجروميكو، هو جاى بيتكلم بيدينا خبر عن الاتصالات اللى حصلت بينهم وبين الأمريكان، وبيقولوا: إنهم عايزين ينشطوا عملية الحل السلمى، وجايب مشروع يعنى هو المشروع لا يخرج عن الكلام اللى احنا قولناه قبل كده.. اللى مشروع مجلس الأمن زائد جدول زمنى.

أهم حاجة فى هذا المشروع إن انسحاب اسرائيل وإنه ميبقاش فيه إنهاء حالة حرب إلا لما تتسحب اسرائيل كلية، وانسحاب اسرائيل على مراحل. والحقيقة أنا رأى إن اسرائيل لن تقبل هذا المشروع أبدا يعنى. والروس كانوا تقريبا اترجوننا إن احنا نوافق على هذا، وإنهم لن يتقدموا بشئ مش موافقين عليه.

فالمشروع مافيش حاجة، يعنى هم كانوا بس حاطين فيه عملية القدس إن القدس لها وضع خاص، فقلنا لهم: ده مش موجود فى قرار مجلس الأمن، بنشطب عملية القدس والباقي كله مشى.

وهم كان رأيهم إن احنا نقدم المشروع ليارنج كانوا قالوا كده لرياض، وأنا قلت: لا.. لأن احنا لو قدمناه ليارنج يبقى إحنا إلترمنا بيه، وبعدين اليهود هيرفضوه ويطلبوا منا تنازلات بعد كده ورأى إن دى مايهاش طريقة؛ روحوا إنتمو اتكلموا مع الأمريكان فى هذا الموضوع.

الحقيقة برضه أنا فى هدفي من هذا إن الامريكان هيرفضوا المشروع يعنى؛ لأن الأمريكان برضه هيتكلموا باسم اسرائيل، وكل ما الأمريكان ما هيرفضوا مشروع مقدماه روسيا، كل ما روسيا هتدينا سلاح أكثر ويتستجيب لطلباتنا أكثر.

أنا رأى إنه لن يكون حل على هذا المشروع لأنه هو عبارة عن انسحاب اسرائيل من جميع الأراضي العربية.. وده موضوع الحقيقة لن يستطيع قائد اسرائيلى أن يقبل بيه؛ لأنهم التزموا أمام الناس بتصريحات يومية والانتخابات بتاعتهم اللى هى جاية فى أغسطس.

## سرى للغاية

الحقيقة هم بعتوا قبل كده، وكان الرومانيين هم الدولة الاشتراكية الوحيدة اللي مش قاطعة العلاقات مع اسرائيل، وكانوا بعتوا نائب وزير الخارجية وإتكلم معايا على أساس إن اليهود عايزين حل سلمى وبياكدوا هذا ويتاع.

الكلام ده من قبل مايو، وبعدين نائب وزير الخارجية الرومانى راح اسرائيل ورجع ومردوش على. إمبراح جالى السفير برسالة من رئيس الجمهورية، وبيقول: إنه كان عندهم سكرتير وزارة الخارجية، وبيقولوا: إنهم عايزين حل سلمى وإنهم متنازلين عن موضوع المفاوضات المباشرة ولكن عايزين يعملوا اتصال غير رسمى بناس غير رسميين عشان نفهم بعض، وإنهم عايزين حل سلمى وإذا إحنا عملنا هذا فيه حاجات كثير هيتنازلوا عنها. هو فى الحقيقة أنا لا أتق فى اليهود فى هذه الناحية مطلقا، وهو الدور الللى فات كان طلب حتى هذا الموضوع، وأنا قلت له إمبراح: إن احنا عندنا قرار إن احنا لا نتصل مانعملش مع اسرائيل أى اتصال لا رسمى ولا غير رسمى؛ لسبب إن احنا لا نتق فى اسرائيل.

وبعدين هو النقطة الثانية: بيقول إن هم بيقولوا إنهم على أساس إنهم مش عارفين وجهة نظرنا، ففيه إختلافات عندهم كبيرة فى مجلس الوزراء، وكل واحد بيدي تصريحات شكل، وإنهم لو عرفوا وجهة نظرنا ممكن يلماو نفسهم فى هذا الموضوع. ده طبعا كلام غير حقيقى، لأن وجهة نظرنا أنا قلتها ليارنج والأمريكان عارفينها، الأمريكان بلغوها لهم وأنا قلتها لنائب وزير خارجية رومانيا أما جه هنا وقابلنى. ولكن هى العملية الحقيقة برضه محاولة من المحاولات، عايزين يعملوا اتصال الحقيقة، وبعدين قالوا: طب اذا عملنا اتصال مع الأردن ماتبقوش عقبة، فى نفس الرسالة. وإحنا بنعتقد إن فيه اتصال يمكن بينهم وبين الأردن، من أيام الملك عبد الله هذه الاتصالات ماشية ولم تنتهى.

لكن الكلام إمبراح إنهم مش عايزين مفاوضات مباشرة، ويرجوا ويلحوا إن احنا نعمل اتصال غير مباشر ولو فى رومانيا نفسها؛ بحيث إن محدش يعرف وتعهدوا إن محدش يعرف.

الحقيقة هى عملية خطيرة جدا، قد يشعر بعضكم طب ليه منعلمهاش؟! العملية خطيرة لأنه سهل قوى فى إنهم يقولوا ويسربوا يعنى لنيويورك تايمز والدنيا دى، وبعدين تبقى عملية تقلب علينا عربيا ويقطعوا حتى الـ ١٠٠ مليون جنيه الللى بيدوهم لنا العرب على أساس إن احنا خالفنا قرار مؤتمر الخرطوم، واليهود فى هذا لا يؤتمنوا إطلاقا.

## سرى للغاية

يعنى هو أنا الحقيقة كلامى وتقديرى إنى غير متفائل للحل السلمى وده يمكن بقوله بإستمرار من يوم قرار مجلس الأمن لغاية النهارده، وفى الوقت نفسه الواحد عايز حل سلمى لأن حل الموضوع عسكريا هيسبب لنا خسائر كثيرة جدا، مش بس فى القوات المسلحة لأ.. يعنى حنضرب.. حنضرب كويس يعنى بالذات الفانتوم والسكاى هوك بيضربونا كويس، وبعدين الأمريكان مش هيسيبوهم. ولهذا أنا رأى: إن احنا أيضا تفوقنا هو اللى قصاد ده لازم يكون التفوق البشرى، وإحنا ماشيين فى عمل كتائب جديدة يمكن من غير ما ناخذ اعتمادات من الخزانة، ولكن أنا قلت للفريق فوزى: ماقدمناش يعنى اذا كانوا الأمريكان بيقلولوا لازم اسرائيل هتكون متفوقة على العرب، إحنا يبقى فيه عندنا حاجة نبقى متفوقين عليهم.

الحقيقة هم فى الحرب كانوا أعدادهم أكثر منا يعنى قواتهم وكانوا أكثر منا، إحنا لازم فى المستقبل بنكون أكبر منهم بالذات من الناحية البشرية.

غانم: هو طبعا فكرة الحل السلمى اللى سيادتك عرضتها، هو الواقع بتثير موضوع اللى هو موضوع سبق إن اتكلمت فيه قبل كده، أنا مش متصور إنه هيكون فيه حرب فاصلة بينا وبين اسرائيل سريعة سواء دخلناها السنة دى أو السنة الجاية؛ يعنى حرب فاصلة بمعنى إنها تحقق أهداف معينة زى تطبيق قرار مجلس الأمن قرار الجمعية العامة سنة ٤٨ أو أى هدف من الأهداف اللى برضه مهياش واضحة برضه فى ذهنى، يعنى إذا كان الهدف النهائى تطبيق قرار الجمعية العامة سنة ٤٨ كهدف نهائى أو أكثر من كده. إنما هو الهدف المرحلى اللى قدامنا اللى هو العودة الى خطوط ٥ يونيو اللى على أساسه هتنتهى حالة الحرب.

فأنا فى تصورى ما دام فى ذهننا معركة طويلة، وإن العنصر الاقتصادى والعنصر الحضارى والعنصر العسكرى كلها عناصر متكاملة فى صراع طويل وفى معارك متصلة سياسية واقتصادية وعسكرية؛ يبقى المرحلة الحالية يمكن ماتكونش أهم مراحل الحرب أو أهم مراحل الصراع اللى بينا وبين اسرائيل بشأن نديها نفس الأهمية، أنا معتقدش إن احنا بنقدر فى فترة قريبة يكون عندنا تفوق كامل .

يعنى باتمنى يكون عندنا تفوق كامل بحيث إن احنا ندخل فى المعركة وننهى الوجود الاسرائيلى أو نفرض عليهم إرادتنا، إنما العملية دى متصور إن احنا ممكن نعملها فى خلال عشر سنين أو فى خلال عشرين سنة، فى ظل تقدم كبير اقتصادى وسياسى وعسكرى.

## سرى للغاية

إذا كانت المرحلة الحالية ليست أهم مرحلة في الصراع العربي الاسرائيلى، ليه إحنا بنديها الأهمية الكبرى بحيث إن احنا نقول والله ده البت في مصير القدس النهارده والبت النهائى في مصير القدس والبت في عملية المرور في خليج العقبة اللي كنا هنبت فيه النهارده هو البت نهائى؟ أنا ماعتقدش برضه إنه هيكون البت النهائى زى ما اليهود في ذهنهم إنهم لما قبلوا ونفذوا قرار الجمعية العامة سنة ٤٨ مكانش في ذهنهم إن هذا هو الحل النهائى للدولة اليهودية، وزى ما كان في ذهنهم انهم لما توسعوا سنة ٥٧ ومروا في خليج العقبة ليس الحل النهائى، ويمكن في ذهنهم النهارده إنهم هياخدوا أراضى وأنا فهمت من سيادتكم إنهم يمكن مستقبلا يكون في ذهنهم التوسع أكثر.

في الواقع إن احنا بندى أهمية كبرى أو عندنا فكرة إن هتكون فيه معركة فاصلة نملى فيها إرادتنا بسرعة إملاء كامل على العدو الاسرائيلى، هل تصورى خاطئ ولا سليم يعنى؟

عبد الناصر: والله سواء كان خاطئ أو سليم هنعمل إيه؟ قل لى يعنى كمل يعنى كلامك. (ضحك)

غانم: هو بالنسبة هو كل الكلام في حدود تنفيذ قرار مجلس الأمن، هل إحنا وضحنا فعلا كل الأمور المتصلة بتنفيذ قرار مجلس الأمن؟ على أى سياسة قومية؟

عبد الناصر: طبعا.. طبعا.

غانم: لا يمكن التراجع عنها في هذه المرحلة، ولا إحنا متأثرين بقرارات صدرت في مؤتمر الخرطوم مثلا وهى اللي بتحكم تحركنا؟

عبد الناصر: لا.. هو الخرطوم بيقول لا تفاوض ولا صلح، والحقيقة إحنا لن نستطيع أن نتفاوض مش بس الخرطوم، الحقيقة النهارده لا يستطيع أنسان إنه يتفاوض مع اسرائيل. وبعدين النقطة الثانية: لا نستطيع إن احنا نعمل صلح إلا برضه إذا تفاوضنا، فهو الخرطوم بيقول لا تفاوض ولا صلح ولا تصفية للقضية الفلسطينية؛ فده الموضوع الحقيقة أساسى.

## سرى للغاية

النقطة.. إحنا قبلنا تنفيذ قرار مجلس الأمن، هم لم يقبلوا تنفيذ قرار مجلس الأمن  
يعنى ده الموضوع الأساسى.. النقطة الأساسية إن احنا قبلنا هم لغاية النهارده لم يقبلوا.  
وبعدين هم بيقولوا: إن قرار مجلس الأمن فيه secured and recognized  
boundries، فبنقول لهم : طيب عايزين إنكوا تقولوا رأيكم بالنسبة لتنفيذ قرار مجلس الأمن  
بالنسبة للانسحاب، فهم بيقولوا: هنسحب لـ secured and recognized boundries ،  
طيب ما هي الـ secured؟ بيقولوا ده كلام مانقولوهوش إلا إذا قعدتوا معنا على طراييزة  
المفاوضات.. دى القصة كلها بالتفصيل بهذا الشكل.

طيب.. هل إحنا الحدود بتاعتنا بتاعة مصر هي محل جدال؟ يطلع إشكول  
بيقول: إن الموضوع عايزين ياخدوا شرم الشيخ ويحطوا نقط في جزيرة سيناء، وبعدين  
بيجى بعد كده إيبان يقدم ليارنج ويقول: مايقولش انسحاب يقول إعادة توزيع! وبعدين  
بيجوا ويقولوا: secured and recognized boundries عبارة عن حاجتين مش  
حاجة واحدة.. فيه حاجة اسمها secured boundries اللي هي قنال السويس ونهر  
الأردن، وفيه حاجة اسمها recognized boundries اللي هي الحدود الاقليمية الدولية  
لاسرائيل.

إذاً معنى هذا نزع سلاح سيناء زى ما طلبوا الأمريكان فى السبع نقط، ونزع  
السلاح للصفة الغربية، ليه؟ لأن ده هو الـ secured بالنسبة لاسرائيل.  
طيب يا جماعة الـ secured and recognized boundries مش بالنسبة  
لاسرائيل بس، ده أيضا بالنسبة لينا، إيه الـ secured بالنسبة لينا؟ العملية ماقتش  
secured بالنسبة لاسرائيل.

هو ده النقاش الطويل اللي داير، فهم لم يوافقوا على تنفيذ القرار ولم يوافقوا على  
القرار ولم يوافقوا على تنفيذ القرار ولم يوافقوا على التفسيرات أى إنهم يقولوا أى حاجة  
الانسحاب.

غانم: لو سمحت لى سيادتك، أنا مبتكلمشى على وجهة نظرهم، لأن قطعاً هي وجهة نظر  
معادية ومش عايزين يسيبوا حاجة أبدا ومش هيسيبيوا حاجة إلا تحت ضغط شديد ومعركة،  
بس مش هتكون المعركة الفاصلة فصل نهائى للصراع العربى الاسرائيلى.

أنا بتكلم عن تحديد وجهة نظرنا بالنسبة للأهداف فى المرحلة الحالية، هل إحنا  
فى المرحلة الحالية هنحل المشكلة المصرية اللي ترتبت على عدوان ٥ يونيه؟ ولا فى  
المرحلة الحالية هنحل الى جانب المشكلة المصرية المشكلة الأردنية والسورية ولا هنحل  
أكثر من هذا المشكلة المصرية والأردنية والسورية والمشكلة الفلسطينية؟



## سرى للغاية

ده بالنسبة لأهداف المرحلة الحالية مش من وجهة نظرهم هم من وجهة نظرهم مش عايزين يتركوا أى شئ، إنما من وجهة نظرنا إحنا وضع سياسة تحدد المعركة لأن إحنا مقررين دخول معركة؛ هذه المعركة هل سنحل بها أولوية أولى للمشكلة المصرية وأولوية تانية للمشكلة الأردنية السورية؟ أم هنكون الأولوية الأولى للمشكلة المصرية الأردنية السورية؟ وهل هنكون هناك أولوية تانية للمشكلة الفلسطينية ولا هى نفس الأولوية للمرحلة دى هنحل المشكلة المصرية الأردنية السورية الفلسطينية؟ دى أمور يعنى مش عارف هى دى فيها قرار من ناحيتنا إحنا مش ناحيتهم ؟

عبد الناصر: إحنا يعنى الحقيقة بنعتبر المشكلة مشكلة عربية، هم عايزين يعتبروها مشكلة مصرية سورية أردنية، طالبين هم هذا التقسيم والأمريكان طالبين هذا التقسيم. إحنا الحقيقة لم نوافق على هذا التقسيم، لأن هذا التقسيم سيضعف الجبهات كلها، وبالتالي إحنا بنعتبر إن الأردن لازالت برغم كل العمليات الحقيقة أكثر منطقة تأثرا على اسرائيل بالعمل الفدائى، ونعتقد إن فى الإمكان زيادة العمل الفدائى وتوسيع العمل الفدائى من الأردن.

فإذا حددنا المشكلة على إنها مشكلة مصرية، وقبلنا أن نحل الموضوع المصرى الاسرائيلى، لن يكون فى إمكان الأردن مطلقا إنها تحل مشكلتها الأردنية بالقوة العسكرية، وبعدين بهذا سنعطى مثل وستتنازل الأردن عن حاجات كثيرة فى سبيل حل مشكلتها؛ لأنه إذا كانت أكبر دولة عربية اللى هى مصر انعزلت بهذا الشكل! وبهذا بيكون عندنا هنا رد فعل عربى فى الداخل، رد فعل الحقيقة عنيف جدا، ولن يقبل هذا إلا بعض الناس المثقفين أو التكنوقراط اللى تفكيرهم قاعدين فى برج عاجى. الحقيقة المشكلة هى مشكلة ما قبل ٥ يونيو وما بعد ٥ يونيو؛ الاستراتيجية بتاعتنا دلوقتى والهدف بتاعنا هو تصفية آثار العدوان لما بعد ٥ يونيو، الاستراتيجية الأمريكية هى إن الآن فرصة مواتية لتصفية المشكلة فى الشرق الأوسط كلها. الحقيقة تصفية المشكلة فى الشرق الأوسط لن يمكن أن تحل إلا بحل مشكلة اللاجئين وعودتهم الى اسرائيل أو فلسطين المحتلة، وهذا الموضوع لن ترضى به اسرائيل. إذاً الموضوع هو موضوع معقد جدا، لما نيجى نتكلم بقى على المعركة النهارده والمعركة بكره، كون إن إحنا نقول إننا لن نستطيع أن نحل إلا بعد عشر سنين نبقى يعنى الحقيقة متشائمين.

## سرى للغاية

غانم: طب المشكلة الفلسطينية يافندم؟

عبد الناصر: لأ.. يعنى أنا بتكلم دلوقتى على إزالة آثار العدوان، يعنى سياسيا مابنتكلمش على المشكلة الفلسطينية، يعنى برضه حتى موضوع اللاجئين هم بيقولوا نعمل مؤتمر بنقول لهم ده موضوع بينكلموا فيه مع الفلسطينيين، ولكن لازم يتحل موضوع اللاجئين وفقا لقرارات الأمم المتحدة، طبعا هم لن يقبلوا اللاجئين.

إذا إحنا الحقيقة المرحلة الحالية هي تصفية آثار العدوان، طبعا فيه ناس عرب زى المنظمات الفدائية بيقولوا: لا يقبلوا بهذا وهذا حل سلمى إستسلامى.. إلخ، كل الكلام اللي احنا بنسمعه ده كلام لا قيمة له.

طيب قدامنا حل من الإيتين، يا حل سلمى يا حل عسكري، نحن نسير الآن في طريق الحل السلمى وسيرنا الى طريق مسدود مفيش فايدة في الكلام. وأنا من أول يوم هنا برضه قلت: هنقعد سنة ونص نلف في كلام بدون نتيجة، طالما إن اليهود عارفين إنى معنديش القوة اللي تخلينى أعبّر قنال السويس، ليه يوافقوا على حل سلمى يخلينى أطلع بمكسب سياسى؟! مايقفوش أبدا إلا إذا كسبوا إلا إذا أملوا شروطهم! طيب بالنسبة لموضوع التعليم.

البرلسى: فيه بس أقول حاجة أقول لسيداتك نقطة هنا، برضه كان فيه لحد إمبارح بالليل ولحد النهارده الصبح مناقشة حول هذا التعديل، مهياش في صلب التعديل نفسه قد ما هي وقت بتاع التعديل، لكن بعض الزملاء من اللي معانا هنا ومن الجامعات، بيقول: هل ياترى أنسب وقت لإضافة هذه المادة أو لإرجاع الرواد الأساتذة مع الطلاب دلوقتى ولأ بعد وقت؟ طيب أخذت مناقشة طويلة، لكن أنا شعرت بالأغلبية برضه بتقول موافقة على إحداث هذا التعديل برغم التحفظ بتاع بعض الزملاء. وبعدين إمبارح في اجتماعنا مع الزملاء الوزراء في هذا الخصوص، وبرضه أشاروا الى بعض النقاط المفيدة للسياسة القادمة أثناء السنة الدراسية.

هو النقطة الثانية: التطرق في القضايا الخاصة بالطلبة لكل عام دراسى قبل البدء، ده كان اتفاقنا السيد وزير العدل قال بكره إن شاء الله هيخلص المواضيع اللي عرضت على النيابة، فيجلنا بكره المفروض أو بيتدى بعد بكره الصبح.

## سرى للغاية

مسألة النقطة الثانية اللى سيادتك شوفتها بتاعة فرص الرسوب، أنا بحثتها مبدئياً لقيت إن يعنى المسألة مش مطلقة على عوائلها كده، فيه خيوط كتيرة لكن تحدد فرص رسوب مهياش متسابة. إنما الرأى الثانى بتاع فرض رسوم على الطلاب الراسبين هو النقطة فيها برضه التوقيت مش المبدأ؛ المبدأ كل الناس كل الآراء متفقة على إن التعليم مجاناً للطلاب الناجح الطالب اللى بينجح على طول، الطالب الراسب حقه يتحمل شئ من الرسوم، برضه الكلام كان على نحلها دلوقتى؟ قلنا: نخليها بقى للسنة الجاية يبقى التعديل ماهواش مرتبط بالحوادث الجارية بتاعة الطلاب.

عبد الناصر: هو كان قال لبيب إن مفيش داعى لفرض الرسوم، لكن كان رأى السنة اللى فاتت الحقيقة نفرض الرسوم على الساقط، فهو قال: معنى هذا إن احنا هندی فرصة للغنى ولا نعطي فرصة للفقير، برضه الغنى هيقدر يدفع والفقير مش هيقدر يدفع؛ فأحسن نحدد عمليات الرسوب وأحسن نأجلها يعنى.

البرلسى: بنأجل.. المبدأ يمكن نفكر فيه ونخليها على السنة الدراسية الجاية مش بمناسبة الأحداث الجارية.

جمعة: بيتهيالى سيادتك استبعدت الحل ده يافندم الجلسة اللى فاتت.

عبد الناصر: الحل بتاع الفلوس؟

جمعة: بتاع الرسوم أيوه.. سيادتك استبعدته خلاص.

عبد الناصر: بنأجل الموضوع كله للصيف.

البرلسى: أيوه يافندم سيادتك، بس مش طالع منى دلوقتى غير التنفيذ غير المادة الخاصة بتعديل اللائحة بتاعة الجزاءات.

عبد الناصر: ومجالس التأديب بالنسبة للطلبة.

## سرى للغاية

البرلسى: أنا منتظر يافندم سيادتك اتفقنا إنها هتتعد بعد ماييجى تقرير النيابة ونقرأ التقرير، وبعدين نستدعى من يجب استدعائهم الى مجلس التأديب؛ علشان كده إحنا مستعجلين شوية على تقرير النيابة.

عبد الناصر: هو إحنا عندنا فى الجدول مذكرة توزيع التخطيط بنخليها برضه للجلسة الجاية، وزارة النقل، مذكرة وزارة استصلاح الأراضى بشأن الاعتمادات الاضافية.

حجازى: بالنسبة لمذكرة وزارة التخطيط لو سمحت.

عبد الناصر: وزارة إيه؟

حجازى: وزارة التخطيط يعنى.

عبد الناصر: آه.

حجازى: يعنى لو اللجنة الرباعية تشوفها قبل ما تقدمها.

عبد الناصر: اتفضلوا شوفوها ونشوفها الجمعة الجاية ما نشوفهاش بعد بكره. مذكرة وزارة استصلاح الأراضى بشأن الاعتمادات الإضافية المطلوبة، وميزانية عام ٦٩/٦٨ لاستكمال الأعمال العاجلة بمناطق الاستصلاح الجديدة بناء على توصيات المجلس بجلسة ٦٨/١٢/١٠، شوفت المذكرة يا حجازى.

حجازى: أيوه.

عبد الناصر: إيه رأيك؟

حجازى: أنا بس خايف الإنفاق الاستثمارى مش ماشى لغاية دلوقتى، فهو طالب ٢ مليون القدرة على الإنفاق أنا النهارده الرقم عندى ٧٥ مليون من ٣١٢. أنا برضه يعنى عايز أسبق وأقول يافندم إن رغم كل التوصيات بسرعة الإنفاق مازال الموقف أنا مش عارف يعنى هو فيه

## سرى للغة

ابتدت كلام إن العملة الأجنبية هي السبب يعنى، أنا أحب من السادة الوزراء يعنى يقدموا نوع من التقييم فى العملية.. المبلغ النهارده.

عبد الناصر: نعمل جلسة نشوف فيها الموضوع.

حجازى: آه.

عبد الناصر: طيب بالنسبة لكلام الأخ بكر، فيه حد ليه بالنسبة للمبانى والإسكان والمرافق والعمليات بهذا الشكل كلها.

بكر: لما تخلص هقدمها.

عبد الناصر: المجموع اللي طالبه قد إيه؟

بكر: ٢ مليون.

عبد الناصر: عندك؟

حجازى: هو إحنا يعنى وصلنا يعنى ٧٠ مليون دلوقتى.

عبد الناصر: يعنى إيه؟

حجازى: وصلنا لـ ٧٠ عجز يعنى.

عبد الناصر: ٧٠ مليون!

حجازى: آه.

## سرى للغاية

عبد الناصر: طيب ٧٢ ماشى، ده غير الكتابيب اللى هيعملهم الفريق فوزى.

مرعى: بالنسبة للاعتمادات اللى اعتمدت من مجلس الوزراء القرارات بتاعتنا ماطلعتش.

حجازى: ما إحنا مستنيين هو إحنا دلوقتى كله إحنا هنرفع علشان بس ناخذ قرار.

مرعى: علشان مايقاش لينا ومنلحقش.

عبد الناصر: آه.. طيب ما نطلع، إبعث لى قرار بكل الاعتمادات.

حجازى: هم مابعتوش لسه التفاصيل يافندم.

مرعى: لأ.. يافندم أنا بعنك النهارده الصبح.

عبد الناصر: الطرق والزراعة وإصلاح الأراضى والإسكان، والرى.

حجازى: هو إذا كنا نرتبط بناء على قرار مجلس الوزراء ممكن نرتبط على طول لما بييجى لنا الاعتمادات، يعنى نكتب للأجهزة المالية الارتباط.

بدوى: هو فى الحقيقة يعنى بمناسبة كلمة الطرق دى، وبمناسبة محطات الصرف الحديث بشأنها، أنا بأكد لسيادتك إن عندنا فى شمال الدلتا يعنى أنا ومحافظ كفر الشيخ قعدنا ٤ ساعات محصورين فى كيلومتر.

عبد الناصر: فين؟

بدوى: فى كيلومتر يعنى فيه كيلومتر واحد مش قادرين نمشى فيه ٤ ساعات، فى الحقيقة الطرق فى شمال الدلتا وبالذات الموصلة لمحطات الصرف اللى هى الطرق اللى كلها هناك..

عبد الناصر: فى الشتاء.

## سرى للغاية

بدوى: يعنى فيه استحالة، وده كلام قيل فى مجلس الأمة قبل كده، وقلنا إن لو حصل برضه فى محطات الصرف - والكلام ده كان سنة ٦٤ - لو حصل فى محطات الصرف أى عطل هناك استحالة فى نجدته، لغاية لما تسبب الأضرار الللى هى عايضة تسببها، فمعرفش يعنى الحكاية دى رغم إنها كلها مسافات بسيطة يعنى الللى ٧ كيلومتر والللى ٨ كيلومتر والللى ١٠ كيلومتر.

عبد الناصر: مين المسؤول عن الطرق دى؟

بدوى: كلها لا تتعدى الـ ٣٠ كيلومتر.

عبد الناصر: يدرسها الأخ ويتقدم لنا بيها.

بدوى: طيب لو سمحت لى يعنى اتصل بيه وأكلمه.

عبد الناصر: آه.

حجازى: هو بس كنت عايز أقول حاجة يافندم، يعنى الاعتمادات بالنسبة للإسكان إحنا الحقيقة المصدر التمويلي ماتكلمناش فيه خالص. ولكن أنا شايف إن شركات التأمين ومؤسسات التأمين - يعنى إمبراح واحد جايلى ميزانية شركة الشرق للتأمين - فيها ٤,٥ مليون جنيه اعتمادات نقدية فى الموجود. فيعنى بدل مانقعد ندور على موارد، أنا بقول: لو كان الإسكان مع مؤسسة التأمين وشركاته الثلاثة، الاعتمادات الـ ٨ مليون الللى إحنا اعتمادناها ولو الجزء الاقتصادى والفوق الاقتصادى تموله مؤسسات التأمين، وأنا شايف الميزانيات الللى لسه معتمدة فى ٦٨/٦/٣٠.

عبد الناصر: ما إنت تجيبها له، معندناش مانع بس إنت تجيبها له يعنى.

حجازى: بس أنا أقصد يعنى التأمين مش تبعى تبع الأخ حسن.

## سرى للغاية

عبد الناصر: معلى طيب مش تبعه هيجيبها إزاي؟! (ضحك)

أصوات: (ضحك)

عبد الناصر: يعنى تجيبها له من التامين من إسكندرية من الشرق يعنى.

حجازى: طيب يافندم.

مصطفى: برضه القرار اللى اتفقنا عليه بتاع القروض علشان الإسكان، سيادتكم قلت أحد البنوك واتكلم فيه إمبرح، مفيش إجراءات تنفيذية يعنى بدأت فى إن البنك يتصل بوزارة الإسكان وغيره وغيره.

حجازى: بنك الائتمان العقارى، أنا بستأذن أنا هتصل بيهم دول.

مصطفى: طيب.

عبد الناصر: مفيش داعى فى الكلام بنقول إن احنا اتكلمنا فى الدفاع حتى مايبانش إن ده نتيجة لعملية بيروت، لكن بنقول: إحنا بحثنا الموقف السياسى والموقف العسكرى وزيارة جروميكو زائد برضه إصلاح الأراضى وإيه تانى؟

بدوى: إصلاح الطرق.

عبد الناصر: النقل نخليه بقى للجلسة اللى جاية كفاية كده.

سلام عليكم.